

Chhuah Jan : October 1984

Kum 39-na Chibai

RAMTHAR

OCTOBER



2023

RAMTHAR FIELD HRANG HRANGA RINGTHAR ZÂT KAN HRIATNA HNÂRTE



VANLALCHHUNGI HMAR
ARUNACHAL NORTH



ROBERT ZORAMCHHANA
ARUNACHAL WEST



RAMCHHANNGAMA
BARAK AREA



R. LALROPUIA
ASSAM



VANLALNELI
KARRI ANGLONG



LALRELLIANA FENATE
CALCUTTA



LALDUHAWMA
DELHI



MARIA LALRAMPARI
ODHISA



A. C. LAWMSANGZUALI
ARUNACHAL EAST



ALFRED LALLIANSANGA
PATNA



LALRAMMAWIA
LUCKNOW



JONNY CHAWNGTHANRILA
SILIGURI



C. LALHMAURUI
JHARKHAND



R. LALHMACHHUANI
TRIPURA



H. LALLAWMKIMI
NEPAL



P.C. LALTHLAMUANI
MASIHI SANGATI



BABY LALRAMPARI
HOME MISSION 'S'

SERMON

Isua Krista - Khawvêl Nunna

Phêk

6 - 9

KUM 39-NA

OCTOBER 2023

BU 453

RAMTHAR ASSOCIATION CHANCHIN BU THLA KIP CHHUAK

EDITORIAL BOARD 2022 - 2024

Editor	: Rev. Thangzauva	9612950043 (M)
Joint Editors	: Upa Lal̄thahluna Ralte	9862570502 (M)
	Upa Zoramthanga	9436362385 (M)
News Editor	: Pi Ruth Lalhmangaihi	9862306787 (M)
Cir. Manager	: Pu Lallawmnakima Hmar	8794905993 (M)
Publisher	: Rev. R. Lalhmingsanga	9534928171 (M)

[Office hun chhúngin biak ni thei se]

Member-te

Rev. Dr. C. Chawngghminglana	: Synod Moderator
Upa B. Lalhmunlana	: Synod Secretary (Sr.)
Rev. Dr. K. Lallawmzuala	: Executive Secy., i/c Mission
Upa Lalramlana	: BEC Member
Upa H. Zoramthanga	: BEC Member

Thu chhuah tûr nei chuan hêngahte hian a thawn theih e:

1. Editor/Cir. Manager, Ramthar Chanchinbu, Synod Office, Aizawl, Mizoram - 796001
2. Email: ramtharchanchinbu@gmail.com
3. Whatsapp: 8794905993

Ramthar Chanchin bua thu chhuah hi a ziaktu mawhpurhna a ni.

SYNOD MISSION BOARD HOTUTE

Rev. Dr. K. Lallawmzuala	Executive Secretary
Rev. R. Lalhmingsanga	Secretary
Upa Lal̄thahluna Ralte	Coordinator

KUM KHAT LĀK MAN - ₹ 60/-

A CHHŪNGA THU AWMTE

1. Editor thukhawcháng	1
2. Keimahni	2
3. Moderator Thuchah	3
4. Ringthar Chanchin Ngaihnawm	4-5
5. Sermon	6-9
6. Article	10-14
7. BUH HMUN AṬANGIN:	15-26
(1) Baruatilla rawngbàwl̄na	
(2) Jairampur Pastor Bial rawngbàwl̄na	
(3) Lal Isua tán mi rinawm - Pu Padam Bika (L)	
8. Engtikah nge i pension dāwn?	27-31
9. Sa Ei Ai rawngbàwl̄na	32-33
10. Ramthar Niah kan hnatláng	34-35
11. Chanchin Ṭha hril leh Sangha tláng vuak	36-39
12. Synod hnua i zirna inte ka tlawh ve a	40-42
13. Ramthar Feh	43-47
14. Declaration	48

ṬAWNGṬAI HUN TAK A NI



Rev. Thangzauva

Pathian hruainain Ramthar Chanchinbuin kum 39 a tling ta. Hei leh chen Pathian Ram rawngbàwl hna ṭha taka a thawk thei hi a làwmawm hlê a ni. He chanchin bu ngaihlua chhiartu zawng zawngte Pathian hmingin chibai kan bûk a che u.

Khawvêl mihring tlûklehdingâwn sarih zet, ṭawng pawh 7,000 vêl awmnaah hian Kristian chu za zêla 31.50 vêl kan ni a; ram lâk tùr a la tam hle mai. Mihring khawvêl hi - sakhaw mî-na khawvêl, Pathian leh sakhua pawh ngaihsak lohna khawvêl, Pathian buatsaih khawvêl, tiin a sawi theih àwm e. *‘India ramah Lal Isua thlen in a vâng’* tih hi a la dik reng a. Hindu-ho hmélma lian ber chu Kristiante hi kan ni a; min chîm ral dân an zawng reng a ni.

India Dànpuì 44-na chuan India khua leh tui te tán Dàn zawm tlàn tùr *‘Uniform Civil Code’* (UCC) a siam a. Chu Dàn chuan sakhua leh hnam dân zùlzuia inneihna te, inṭhen te, ro khâwm leh fa lâk thlengin a ṭhiat vek dâwn a ni. Sakhaw dàna thiltih zawng zawng hi - chu dân chuan a luahlân vek ang a; sakhaw thila danglamna rêng rêng chu nuai bo vek a tum a ni. He Dân hi hman a nih chuan sakhaw tenau - entír nán, Kristianna chu chîm ralin a awm ang a, Hindu sakhaw tih dàna lem zawhin kan la awm thuai ang. Hindu sakhua min pawmtír tumna a ni. Bible-in, *“Mi ngaiha kawng dik ni àwm taka lang, a tàwp chu thihna kawng ni si a awm,”* (Thuf 14:12) a tih ang kha a ni. He Kristianna dodâlna dân verther tak hi hman a nih loh nán tûn hi - *‘Ṭawngṭai hun tak a ni’*.

SMB-a thawktu dinhmun tlángpuì (2023):

Mizoram mi Missionary (1,655); Mizoram mi Minister Missionary (150); Field Worker Missionary (867); Field Worker Minister (45); **Mission Field-a thawktu zawng zawng (2,717)**. Hqtrs, MTC, MDTC, Ramthar Hostel, Education, Trainees, Hmangaihna In-a thawk (110); **SMB thawktu zawng zawng (2,827)**.



Special Issue

KEIMAHNI**† TUARPUINA:**

1) Pu K. Vanlalruata (75), Ramhlun Venglai, Pastor Henry Lalbiakkima i/c Changlang Pastor Bial (Arunachal East Field) leh NI. Zonunsangi Khiangte, Evangelist, Aligaon (Delhi Field) te pa chu ni 5.9.2023 khán *Stroke* vângin a thi.

2) Pi Christina Lalngaihawmi (33), Rev. C. Rosangzuala i/c Damdep Pastor Bial (Home Mission South) chu ni 7.9.2023 khán *Dengue* leh *Scrub Typhus* vângin a thi.

3) Pu R. Pahlira (72), Vairengte Venghlun, Pu R. Vankunga, Evangelist, Baruatilla (Cachar Tlangram/Barak Area) leh Pu M. T. Mawia, Craft Tracher, Bualpui (MDTC/Home Mission North) te pa chu ni 18.9.2023 khán *Alzheimer* vângin a thi. Pu R. Pahlira hi SMB Missionary pensioner a ni.

4) Pi Kapthanmawii (60), Evangelist (Masihi Sangati Office, Bawngkawn) chu ni 19.9.2023 khán *Cancer* vângin a thi (*A chanchin hi thla lehah rawn tihchhuah kan tum e*).

Ramthar Editorial Board-in lusún chhúngte a tuarpui tak zet a ni. Pathianin awmpuiin thlamuan rawh se.

† JAY JAY KARO TLUANG TAKIN NEIH A NI: SMB Media Sub-Committee-in ni 1-29 August, 2023 chhúnga a buatsaih - Hindi Pathian Fakna Hla Mal Zai Intihsiakna (Jay Jay Karo) chu tluang taka zawh a ni a. Làwmman pakhatna hi NI. Sheila Lepcha, Bawngkawn-in a dawng a ni.

BANK KAL TLANGA RAMTHAR MAN PE DUH TÁN

Account Holder : SYNOD RAMTHAR

Account No : 10665621086

IFSC : SBIN0007058

Bank : State Bank of India

Branch : Mission Veng

Bank-a pete chuan an pêk veleh Circulation Manager (WhatsApp No. 8794905993) hnênah hriattír ni se.

SYNOD MODERATOR THUCHAH

Rev. Dr. C. Chawngghmingliana

Moderator

Mizoram Presbyterian Church, Synod



Synod Ramthar Chanchinbu-in hma a sâwn zêl a. Kumin (2023) hian a kum 39-na a lo ni ta hial mai. Tûn thla (October) *Special Issue* chhuak tùrah hian Thuchah ziaik tùra sàwmna Editor Rev. Thangzauva hnên aṭangin ka dawng hlah mai a, vânei ka intiin, ka lâwm hle mai. Ramthar Chanchinbu latute (Subscribers) leh chhiartute zawng zawng Synod aiawhin kan Lalpa Isua Krista hmingin chibai ka bûk che uin, duhsakna ka hlân vek a che u.

Chanchinbu hi a buaipuitu tán lo chuan a harsatzia leh a buaithlâkzia hi hriat thiam rual a ni lo. Thla tina *Editorial* han ziah hi a buaipuitu tán chuan duh aiin thla a lo thar hma mah mah ṭhin. Article leh sermon ṭha ngaihtuah reng a ngai baw. Chanchin thar, mi bengverh deuh tùr zawn khâwm reng a ngai baw. Chutiang kárah chuan Ramthar chanchinbu-in a kum 39-na a lo thleng ta mai hi a làwmawm tak zet a ni. A bul lo ṭantute aṭanga tûn thlenga ṭhahnemngai taka buaipuitute an fakawm tak meuh mai. An chungah Synod hmingin làwm thu ka sawi baw a ni.

Ramthar chanchinbu hi kháwla chhut chhuaha a bu-a chhuah a nih bâkah a *soft copy*-a chhuah a ni leh zêl te hi hmun hla zâwk leh kilkhâwr zâwka awmte tán pheii chuan a hlu leh zual êm êm a ni. Computer-a chutiang ti thiam êm êm kan nei zêl thei mai te hi a vâneihthlâk êm êm a ni.

He Ramthar chanchinbu hi a chhiartu apiangte tán thlarau lama chak tharna petu leh an hriatna tizautu lo ni zêl rawh se.



RINGTHAR CHANCHIN NGAIHNAWM

BÁWLPU FAPA KHA CHANCHIN THA HRILTUAH

Jeetan Hembrom

Dumka, Jharkhand

Mobile No: 8292984924



Unau pariat kan ni a, kan retheiin ei leh in tùr mumal pawh nei lovin kan awm thìn a. Ka pa hi Bàwlpu (*Ojha guru*) a ni a. Inthâwi nán ár te, parva te leh zu te an rawn keng thìn a. Amaherawhchu, amah chauhvin chutiang chu a ei zo vek thìn a ni. Kan retheih êm avàngin ka nu hian zu siamin kawngpui dungah a zuar thìn a. Ka unaute pawh zu in mi niin, kan chhúngkaw boruak hi a hrehawm thei hle.

Chutiang chu kan dinhmun a nih avàngin hna thawk (*labour*) tùrin Mizoramah ka kal ta a. Hetih lai hian Pathian Thu leh piantharna awmzia pawh ka la hre ngai lo. Chutia hna thawka kan awmna hmunah chuan Evangelist an lo kal fo thìn a, Isua Chanchin Tha an rawn hril thìn a ni. Inkhâwm tùr tein min sáwm a, min ngaihsakin min duat êm êm thìn a. An hméla hmangaihna lo lang kha a mak ka ti thìn hle. Keini hnam dang mi khati tak maia min hmangaih kha mak ka ti a, an unau leh chhúngkhat ang maia min ngaihsakna khân ka rilru a hneh thìn êm êm a.

Chumi avàng chuan an rin Isua kha hriat chian ka châk thìn a; min hmangaihnaah khân Isua hmangaihna a lang niin ka hria. Tichuan, an inkhâwmna hmunah te chuan ka kal ve ta a. Kum 1984 a lo thlen chuan ka nun chu Lal Isua hnênah hlânin Baptisma ka chang ve ta a ni. Hetih lai hian *labour* hna ka la thawk reng thìn. Kum 1992 a lo thlen chuan Pathian Thu hriat belh deuh deuh châkna ka lo nei ta a; tichuan, Hindi Bible School-ah ka *training* ve ta a.

Training kan zawh hnu chuan Kolasib Diakkawn Kohhran-ten kan awmna chheHvêla Chanchin Tha hril tùrin

min ruai ta a. Amaherawhchu, kan ram lama ka chipuite leh ka chhúngte ka ngaihtuah thìn a. An tán ka ÷awngt̄aisak thìn a, chhandamna chang ve ngei t̄urin ka duhsak thìn hle. An hnêna Chanchin Ṭha hril ve theih chu ka ch̄ak êm êm thìn a, Pathian hnênah pawh ka d̄il thìn a ni. Pathianin ka ÷awngt̄aina chu min chh̄ansakin, Kolasib Diakkawn Kohhrante chuan kan ram, Jharkhand lama rawngb̄awl t̄urin min t̄ir thla ta a ni.

Tirkohte Thiltih 16:31-a *“Lalpa Isua ring la; tichuan, chhandamin i awm ang, nang leh hi chhúngte nèn,”* tih ka hmuh hian ka chhúngte hnên ngeia Chanchin Ṭha hril hlàn ka ngh̄akhlel êm êm mai a. Kum 1992-ah chuan Isua chanchin hrilh theihna hun chu ka nei ve ta. Hetih lai hian ka pa chu zu in nasat avàng leh TB natna avàngin thichh̄awngin a let reng tawh a. Isua chanchin hre lovin a boral ang tih ka hlau êm êm mai a. Pathian hnênah a dam leh theih nán leh ringtu a lo nih ve theih nán ka ÷awngt̄ai thìn a. Pathianin ka ÷awngt̄aina chu chh̄angin ka pa pawh chu a lo dam ṭha leh ta a, a tàwpah chuan ringtu niin baptisma pawh a chang ve ta a, a inth̄awina zawng zawng te tichhiain kan h̄al ral ta a ni.

T̄unah hian Pathian khawngaihna rawngb̄awlna pawh ka la chhunzawm ve thei z̄el ta z̄el a. 1995-ah Rev. Lalrinawma chu Mizoram Synod-in rawn dahin, rawng te kan b̄awl dùn thìn a. A t̄irah Presbyterian Kohhran a din loh avàngin ringthar hmasate chuan CNI Kohhranah baptisma an chang thìn a. Ringtharte chuan ngaihsak an hlauh tâwk loh avàngin Rev. Lalrinawma kaihhruainain Dumka-ah a hrangin Fellowship din a lo ni ta a, Kohhran pawhin hma a lo s̄awn ve ta z̄el a ni.

T̄un dinhmun ka thlen theihna bul chu, Mizoram ka awm laia min hmangaiha Isua chanchin min hrilh th̄intute kha an ni. Pathianin a l̄et tam takin mal a s̄awm ang tih ka ring a, an rawngb̄awlna avàng khán kan hnam (Santal) zingah mi tam takin chatuan nunna kan neih phah a; Pathianin an hnathawh kha a chhinchhiah reng ang tih ka ring a ni. Pathiana mi nung pathum - Pa leh Fapa leh Thlarau Thianghlim chu ropui ber rawh se.



SERMON ISUA KRISTA - KHAWVÊL NUNNA

"Kei zawng nun an neih nán, tam taka an neih nán lo kal ka ni," (Johana 10:10)

*Rev. Dr. Lalmachhuana
i/c Bawngkawn Bethel Pastor Bial
Mobile No: 9402112076*



Nunna hi thil nung zawng zawng tána damna a ni. Thil nungte chu anmahni nihphung ang zêlin an chê, an òhang, an inthlah pung òhìn. Nunna a tàwp chuan thih a ni a, chawpchilhin chakna leh theihna a tàwp a, òangkaina leh hlutna a bo ngâh. Thil nung tawh phawt chuan nunna an mamawh vek a, Isua Krista nunna hi khawvêl tána Vàn thilpêk hlu ber a ni.

Isua Kristaa nunna chu! Nunna bul leh a neitu chu Pathian a ni. Pathianin mihring hnára a thâwk luh aòangin mihring chu mi nung a lo ni (Gen 2:7, Job 33:4). Pathian nunna leh Isua Krista nunna chu a inzawm a, òhen hran theih a ni lo. Lal Isua chu chatuan nunna neitu, vàn aòanga chhang nung lo chhuk, kawng leh thutak leh nunna, khawvêl tán nunna leh damna tluantling a ni. Lal Isua hmanga Pathianin a buatsaih chatuan nunna chu mi tin ta tùr Chanchin Òha làwmawm êm êm a ni.

Chatuan nunna chu Pathian chatuan nihna òâwmpuia chatuan thil, hun leh hmunin a thunun phâk loh, eng lai pawha nung reng a ni. Chatuan nun chu mihring tán damna tluantling a nih avàngin Pathian ngaiha thil hlu vâwr tàwp a ni. Isua ringtute chu chatuan nun neitu an ni a, Pathian fâ, Pathian chhúngte, vàn khua leh tui an ni. Ringtute chuan khawvêl neih loh Pathiana làwmna thurûk, lungawina kim, thlamuanna tak tak, chatuan nun an nei. Isua Kristaa nunna hi ringtu leh

ring lote mamawh in̄tâwm,
rilru taksa leh thlarau damna
leh hriselna kum hlun a ni.

awm lo va, kohhran din chhan
leh hna pawimawh ber a ni.

Kohhran - Isua Krista nunna thuchah kawltu:

Kohhran hi Isua Krista din, a
thisena a lei, a taksa leh
khawvêla Isua aiawh tura
awm a ni. Lal Isua pawhin
kohhran chu thuneihna sâng
tak a pêk— vânrâm chabi
kawltu, lei leh vâna phuar leh
phelh theih khawpa thuneihna
a kawltîr a ni. Isua Kristaa
nunna thuchah chu kohhran
kutah dahin a awm a, kohhran
chu Krista nunna thuchah
kawltu leh kengtu a ni. Thihna
leh thawhlehnâ chungâ
thuneitu Lal Isua chuan vâna
lâwn hma-in Kohhran ho
hnênah thupêk ropui tak a pêk
a; chu thupêk ropui chu thil
siam zawnz zawnz leh hnam
tina mite hnêna Chanchin Ṭha
puan leh hrilh te, a ring apiang
te chu Pa leh Fapa leh Thlarau
thianghim hminga Baptist tûr
leh zirtîra siam a ni (Mt 28:18
ff). Khawvêl damna leh nunna
tura Chanchin Ṭha palai
hnathawh aia hna pawimawh
hi kohhran leh ringtu tân a

Khawvêl mamawh Isua

Krista nunna: Pathiana nun
nei lo khawvêl hian nun tak
tak a mamawh a, chu nun tak
tak chu he leiah leh chatuan
thlenga nunna a ni. Khawvêlin
Isua Kristaa nunna a mamawh
dân thuah thum chu Pathiana
nun neih nân, mahnia nun tak
tak neihna tûr leh mi dang
tâna nun tam neih nân a ni.
Lal Isua ringtu leh ring lotute
pawhin he nunna hlu hi kan
mamawh tlâng vek a,
mamawh lo tu mah a awm
theih loh.

Khawvêlin Isua Kristaa
nunna a dawn sawn dân
tlangpui chu rilru inhawng leh
lâwm taka pawm emaw, duh
lova hawisana hnâwl emaw a
ni. Lâwm taka pawmtuten ni
tin an tuai thar a ngai a,
Thlarau Thianghlim tihnun a
tûl a, nunga hman chhuah
reng a ngai. Paulan, ‘Hria sela
chuan ropuina Lalpa chu an
khéngbet lo vang,’ (I Kor 2:8)
a tih angin duh lo tute pawhin
Chanchin Ṭha nihna dik tak an

hriat loh avànga hnâwl an ni àwm e.

Isua Krista nunna thu puan: Chanchin Ṭha la hre lote hnêna hriattír leh puan chhuah hi nunna thuchah kawltute bat leh tih mâkmawh a ni. Chanchin Ṭha nihna tak tak an hriat miao loh chuan Lal Isua duh nghâl ngawt ngaihna a awm lo va, an demawm lo ve. Ṭhenkhat chuan Chanchin Ṭha nihna ril hre lovin an táwng páwng duh lo va, an dodâl a, an hawisan bawk. Hêng mite hi Chanchin Ṭha zîktluak taka hrilh an ngai a, an hriat thiam theih tùra thiam taka hrilhfiah an òl a, an duh/pawm ngeina tùrin âwihawm taka chhawp chhuahsak an òl. Engti kawng záwng pawhin Chanchin Ṭha hrilh leh puan darh hi kohhran hna bulpui leh rawngbàwl na pawimawh a ni. Lal Isua thupêk a nih miao avàngin Chanchin Ṭha hrilh hi ringtu zawng zawng tán ngaihtah leh hlamchhiah thianga ni lo. Tihna tuipuiin a chimpil mék te nunna hruia thlun hi kohhran tih tùr a ni.

Nunna thuchah puan leh hrilh: Lal Isua ringtu tawh phawt chu Chanchin Ṭha hrilh tùra koh kan ni. Rawngbàwl tùra kohna hrang hrang a awm a, kohna dawn dân a inang lo va, hrilh leh puan chhuah dân pawh a thuhmun diak diak lo. Chanchin Ṭha hrilh dân ki pawimawh te chu: mahni ngei kal chhuaka la hre lote hnêna hrilh te, nun leh thiltih hmanga Krista thuhretu rinawm nih te, ṭawngṭai leh thilpêk hmanga a hrilh te a ni.

Chanchin Ṭha ram mut hna thawk tùr chuan rinna kawnga mi puitling te rawngbàwl na a ni a, Isua Kristaa nun tak tak leh nget neih, mi dang ten malsàwmna an dawn theihna tùra mahni inteitêt leh nun tam neih a òl. Puan leh hrilh hna thawk tùr chuan kalsan leh kal chhuah a ngai. Mahni ngainat leh thlâkhlel te, nawmsakna leh hamṭhatna te, dinhmun leh nihna te kalsan lo chuan Krista tán ram mut hna a thawh theih loh. Chanchin Ṭha mamawhtute hnên thlen, luh chilh leh an nun ṭawmpui tùr

chuan a òl na apianga kal
chhuah a òl a, inpek leh
tuarchhel, mahni inphat leh
inkhenbeh a ngai tel.

Ringtute hi khawvêl êng
leh lei chi kan ni a, khaw
hmunah pawh, eng hunah
pawh, eng lai pawhin Krista
thuhretu rinawm ni tùra koh
kan ni. Krista thuhretu kan
nihna hi nun leh thiltih, thu leh
hla hmanga lantír hi kan nih
dàn tùr rêng a ni. Kal chhuak
thei lo tán awm hmun ațangin
thil tam tak a thawh theih.
Tawngtăina hi mi tin thawh
theih rawngbàwl na pawimawh
a ni a, Krista pasaltha
rammu te tán chakna leh
chaw tha, Pathian thiltih-
theihna sawr chhuahna a ni.

Thilpêk – sum leh pai
hmangin chi tin, tawng tin leh
ram tin a mite hnênah nunna
thuchah a hril theih. Koh-
hranho thilpêk hi Pathianin
mal a sàwm a, rawngbàwl na
hmanraw duhawm leh
țangkai a ni. Rawngbàwl naah

chuan ‘inpêkna kimah muan
a kim t̃hin’ (KHB 415) tih a ni
a, thawk rim te tán làwmna,
lungawina leh chawlhna
nuam a ni.

Tláng kawmna: Khaw-
vêlin a mamawh hmasa leh
lian ber mah se a hawisan fo
chu Isua Kristaa nunna -
chatuan nun a ni. Chatuan
nun chu khawvêl tán nun
duhawm leh hrisèl, danglam
ngai lo, damna famkim leh
chatuana nung reng tùr a ni.
Isua Krista nunna t̃awmpui hi
Pathian lawm zăwng, Pathian
ram zauhna leh nghehna a ni.
Kohhran hi Chanchin Tha
kawltu kan ni a, puan darh hna
thawh hi Kohhran nih dàn tùr
rêng a ni. Lalpa Beràm
huanga seng lût tùrin
Kohhranhote hian kan thlen
chin ațanga hmasâwn tùrin
t̃hahnem ngai ila. Nunna
Lalpa hnên ațangin ‘bâwih
tha leh rinawm, i ti tha e... I
pu làwmnaah lût rawh’ tih
hlawh thei tùrin theih tâwp i
chhuah t̃heuh vang u.

*[Special Issue-a Sermon min ziahsak tùra kan sàwmna min tihhlawhtlinsak
avàngin Rev. Dr. Lalhmachhuana chungah làwm thû kan sawi e - Editor]*

ARTICLE

TÛN LAI HUNA ISUA KRISTA PAWIMAWHNA

Rev. Dr. C. Lalramchhana
Principal, Missionary Training College
Mobile No: 9862614150



Lal Isua Krista lo pian lai kha Rom sawrkarin ram zau tak a awp hun lai a ni a. Grik finna leh thiamna, an ãawng leh nun dân kawng tinréngin mi tin mai a hneh hun lai a ni. Mi ãhenkhat chuan kum 2000 zet liam tawha khawvêl leh tûna kan khawvêl hi a inang lo lutuk a. Lal Isua zirtírna thute pawh kha a hun lai khawvêl atán chuan a pawimawhin a ãangkai hle nâ a, tûn lai khawvêl leh mihring nun nêna khaikhin pawha kawng tinrénga inthlau lutuk tawh nèn hian a inmil thei tawh lo va; chuvàngin, Isua zirtírnate kha tûn lai hun atán a ãangkai tawh lo niin an ngai a ni. ãhenkhat phei chuan engkim neia an inhriat hian sakhua leh rinna chu hnawh an ti a, Isua Krista chu mi retheite mamawh ang chauhvin an sawi duh tawh a ni. Chuvàngin, tûn ãumah hian tûn lai hunah pawh Isua Krista a la pawimawh rengzia tàr lan kan tum dâwn a ni.

1. Isua Krista hi Pathian ram dintu a ni: Pathian ram chu – Pathian lal berna leh a rorèlna thinlung hi a ni a. Chu chu Pathian duh zâwng tihna leh amah chawimawina a ni bawh. Mihring suala a tlûk a ãang khan he khawvêla Pathian lalram chu a tlu ta kan ti thei ang. Pathian ram din leh hi Setana hlauh ber a ni a. Mahse Pathian chuan mihring thinlunga Pathian

lalram din hi a tum nghet hle a; a tàwpah a Fapa Isua Krista a rawn tír ta. Pathian Fapa lo lan chhan ber chu Diabola hnathawhte tihborala, Pathian ram din zêl hi a ni. Lal Isuan ãawngtai dân min zirtírah pawh “*I ram lo thleng rawh se,*” tih a ni. Chu ram chu tûnah kan zingah a thleng tawh a, a thleng mék a, a famkimna chu nakínah a ni dâwn a ni.

Pathian ram a thlenna apiangah thlamuanna a lo thleng thin (Jn 14: 27). A chhan chu kan thih pawhin Isua, thawhlehna leh nunna chuan chatuanin kan nung reng dawn tih min hrihl tlat a ni (Jn 11:25). Hêng thu làwmawmte hi hun bithliah chhúng atán ni lovin, khawvêl awm chhúnga mihringte tán a ni reng dawn a ni.

2. Thupêk ropui - Pathian hmangaih lêt ve hi kan bat a ni: Pathianin a Fapa kan tána a rawn tírh chhan hi Johana hian a sawi Chiang hle mai - *“Pathianin khawvêl a hmangaih êm êm a; chuti-chuan, a Fapa mal neih chhun a pe a, ...khawvêl amah avânga an dam theihna tûrin a tîr a ni zâwk e”* (Jn 3:16) tih hi a ni. Pathian Fapa Lal Isua Krista kan tána a rawn inpêkna ril leh ropui tak mai chu - *“ani zawngin Pathian anga awma, Pathian tluka awm chu thil thlâkhlelh hleih theihah a ruat lo va, mihringte anga lo piangin, bâwih angah a insiam a, amah leh amah a intitláwm ta zâwk*

a. ... a inngaitláwm a, thi khawp hiala thu zâwmin a lo awm ta a, kraws-a thihna ngei chu,” (Phil 2:6-8) tih a ni leh a. Pa leh Fapa chuan anmahni lama an tih tûr chu an ti fel tawh. Keini lamin kan Lalpa Isuan thupêk ropui bertia min hrihl - *“Lalpa i Pathian chu i thinlung zawng zawngin, i thlarau zawng zawngin, i rilru zawng zawngin, i chakna zawng zawngin i hmangaih tûr a ni,”* (Mk 12:30) tih hi kan zawm a pawimawh ta ber mai. He thu ropui hi hmânah leh tûnah a pawimawhna a inang reng a ni.

Khawvêla kan awm chhúng hi chuan sual hi a bo dawn lo. Mahse sual leh a thiltihtheihna laka keimahni kan inlâk hran theihna tûr leh sual kan hnehna kawng tha ber chu thupêk ropui ber kan zawm hi a ni. Mihring famkim lo leh chak lo nunah chuan thupêk ropui hi zawm famkim a har deuh pawh a ni mai thei. Amaherawhchu, hetiang taka Pathian hmangaih lêt vena nunah hian sual ngaihtuah leh tihna hun a awm lo tih a

chiang a, chutiang nun kan neih chu sual hnehna atán a pawimawh ber a ni. Kan ni tin nun leh thiltih, kan ðawngkam leh kan ngaihtuahna zawng zawng te tlûkna laka min véngtu a ni a. Hetiang nun hi Pathian lalram nun a ni a, engtik lai pawha ringtute mamawh a ni.

3. Isua chauh hi Pathian hnèn thlenna kawng awm chhün a ni reng dáwn:

Isuan, *“Keimah hi kawng leh thutak leh nunna ka ni; keimaha kal lo chu tu mah Pa hnènah an thleng ngai lo,”* (Jn 14:6) tiin a sawi a. Khawvêl awm chhúng chu hei hi a la ni reng dáwn. Kawng tam tak zínga pakhat ang chauhva sawi tumtute pawh lo chhuak ðhin mah se, Pathian Fapa thu sawi leh a nihna hi a danglam ngai dáwn lo a ni. Hei hian ðahnemngai taka a zirtírte a tírh chhuahna thu – *“Kal ula, hnam tina mi zirtírahte siam ula, ... baptis ula, thu ka pêk zawng zawng che u pawm túrin zirtír rawh u”* (Mt 28:19, 20) a tih hi ringtuten inthlahdah hauh

lova kan bawhzui zêl a ðùlzia a ti lang.

4. Lal Isua kan mawmawhna a nasa tual tual:

Khawvêla kan awm chhúng hian thlarau lama rilám leh tuihâl an awm reng dáwn. Tu mahin, eng sakhua mahin chu chu an titlai thei lo. Mahse Isua erawh chuan a titlai thei, nunna chhang leh in túr tak a nih vàng a ni (Jn 6:35).

Mihringte hian kan dam chhúng chuan ei leh in, silh leh fèn túr kan mamawh vek a. Mi hausa leh mi rethei pawhin hrisèlna kan mamawh vek bawk. Lal Isuan, ei túr aiin nunna, silhfèn aiin taksa a pawimawh zawk tih sawiin, kan taksa leh nunnain a mawmawh hretu leh pêk túr neitu Pathian rin leh a thu âwih hmasak chu ngai pawimawh hmasa túrin min duh (Mt 6:33). Pathian ðihna tel lova sum khâwlte dinhmun chu an thih hnuah mi hausa â tehkhin thu ang chauh kha an la ni dáwn a ni (Lk 12:20-21). Lal Isua nêna ei zawn kan inzirtír nasat deuh deuh a ðùl hle.

Mahni duh dân ang anga kan nun kan hman lai hian kan chungah harsatna, mangan-na leh hlawhchhamna te, chhiatna râpthlâk leh thihna te a lo thlenin Pathian kan mamawhzia a lo lang leh thìn. Mipat hmeichhiatna hman khawlohna te, ruih hlo (drugs) leh social media hman khawlohna leh ngaihna (addiction)-ten min rún nasa hle mai. Chu chuan mi mal leh chhúngkuaah taksa, rilru, leh thlarauva natna leh harsatna a thlen nasa a; chhúngkua leh khawtláng, kohhran leh ram thlengin min nghawng tak zet a ni. Chhúngkaw tam tak kan mangang a, kan rilru a hah lai hian belh tùr kan mamawh a.

Hetiang hun lai taka *“Nangni thawk rim leh phurrit phur zawng zawngte u, ka hnênah lo kal ula, keiman ka chawlhthír ang che u. ... tichuan, in thlarau tân chawlhna in hmu ang,”* (Mt 11:28, 29) titu Lal Isua kan lo nei hi kan vânnai hle mai. Amah bel tlattu nih hi a la pawimawh deuh deuh dawn a ni.

5. Nun hona atán mi dang hmangaih tùr in Isua Krista min zirtír: Isuan thupêk ropui ber dawttu nia a sawi chu *‘Nangmah i inhmangaih angin i vêngte pawh i hmangaih tùr a ni,’* tih hi a ni (Mk 12:31). Hêng aia thupêk ropui zâwk rêng rêng hi a awm lo niin a sawi baw. He thupêk hi a taka chantír tùr chuan tanpui ngaite tanpui te, mi dangte tána inphal te, mahni lamin chán dawn pawh ni ila mi dang tána tha tùr duhsak zâwnga thu tlûkna siam ngamna te a keng vek mai. Hêngte hian thenawm khawvêngte hmelmah siam lovin, thianah a siam zâwk thìn a. Chu chuan chapona leh duhâma avânga inrem lote kârah inremna a thlen zâwk thìn a ni.

Khawvêl hi duhâma leh inngirngonain a khat a. Khaw tam takah chuan kan rorêltu atána kan thlan, Village leh Local Council member-te ni tin hna chu in hmun lo ram inchuh buaipui hi a ni. Hênga intibuai reng mai te hi ringtute hlir kan ni.

Lal Isua duh dân hi nunpui ngam ila chuan inngihirngona leh buaina hi chu a bo tùr a ni. Remna hi kan va mamawh êm! Isua hi Pa Pathian nêna kan inremna, mihringte inkára inremna a ni a. Ama zarah ringtute chu khawi hmunah pawh mi dangte nèn inrem taka awm khâwm thìn tùr kan ni. Johana chuan, “*Miin, ‘Pathian ka hmangaih e,’ tiin a unau haw si sela, amah chu dawthei a ni; a unau a hmuh tawh renga mah a hmangaih loh chuan, Pathian a hmuh ngai loh va chu engtin nge a*


hmangaih theih ang?” (1 Jn 4:20) tiin a sawi a. Hmâna Isua dam laia an mamawh zirtirna thu chu vawiinah hian kan va la mamawh êm!

Khawvêl leh a chhúnga roréltute pawh inthlâkin, ram leh mihring te, kan nun dân leh kan hnam dân pawh nasa takin lo changkâng hlein, lo inthlâk danglam zêl mah se, kan Pathian thutak leh Lal Isua pawimawhna hi mi zawng zawng tán a pawimawhna a ngai reng dâwn a ni.

**[Kan sàwmna ngai pawimawha Aricle tha tak min ziahsak avàngin
Rev. Dr. C. Lalramchhana chungah kan lâwm hle - Editor]**

HRIATTIRNA

Kum 2024-2025 chhung atan Synod Revival Speaker lak a ni dawn a. A dil duh tan dil theih a ni. Dilna Form hi Synod Revival Office-ah Office hun chhungin lak theih a ni. Dilna Form chu October 2023 ral hma ngeiin Revival Office-ah thehluk tur a ni ang. Diltu zawng zawng hi November 21, 2023, zing dar 7:00 am atangin Synod Committee Room No 1, Synod Office-ah interview tur a ni ang.


(REV. C. ZORAMMAWIA)
Senior Executive Secretary
i/c Revival

Special Issue

BUH HMUN AṬANGIN BARUATILLA RAWNGBAWLNA

*Lalramnghaki Fanai, Headmistress
PMS Baruatilla, Barak Area
Mobile No: 8119818736*



Baruatilla khua hi Mizoram leh Assam inrì-na bula awm a ni a. Mamit District chhúng, Thinghlun khua aṭanga Kilometre sarih vèla awm a ni. Forest Reserve chhúnga awm niin, Karimganj District chhúnga chhiar tel a ni.

A khuaa chêngte hi Sakachep an ni ber a, Chorei leh Hrangkhawl tlém an awm baw a. A khaw chhúngah hian kan Kohhran bák kohhran dang a awm lo ang a ni a, Roman Catholic, khaw danga lawi, in hnih an awm a; a bák chu Kristian zawng zawng hi kan kohhran member an ni a. Kum 1977 khán Baruatilla Kohhran hi a ding ṭan a, tûnah hian Kohhran member 254 vèl awmin, Zaité Pastor Bial chhúnga awm kan ni.

Baruatilla-ah hian thawktu Quarters te chhiar tel vekin in 72 vèl kan ni a. Hêng zínga Kristian hlang chènna chu in 50 niin, in riat hi inawm pawlhna a ni a, Roman Catholic in hnih leh ringlo in

12 kan ni. Mihring chêng zât hi kan zavaiin 400 báwr vèl kan ni a; hêng zínga 94-te hi ringlo an ni a. ‘Hindu’ tiin an insawi ṭhìn nân, an sakhaw tih dàn en hi chuan kan pi leh pute sakhua la zuitute an ang zâwk mah a, Bàwlpote neiin ár leh vaw k tein an inthâwi ṭhìn.

Baruatilla-ah hian Mizoram Synod Mission Board hnuaiah High School kan nei a. Mizoram Synod-in a enkawl hma hian Cachar Hill Tribe Synod hnuaiah an awm ṭhìn a. Chûng hun laia lo thawk hmasaten *informal school* ang tea bul lo ṭanin, Primary school te an hawng a, chutianga kum eng emaw zât an kalpui hnuin kum thum

chhúng vêl khàr leh lailâwk a nih hnuah Mizoram Synod enkawlina hnuayah Gilead English Medium School tih hmingpuin kum 2002 khán din thar a ni leh ta a ni. Primary school aṭangin Middle-ah kum 2016 khán *upgrade* a ni a, helai hnaiah English Medium High School a awm loh avàngin he laia chêngte mamawhna avàngin kum 2021 aṭang khán High School ah *upgrade* a ni leh ta a ni.

Tûnah hian KG I – Class X neiin zirlai 319 kan nei mék a. Hêng kan naupangte hi kan khua mai bâkah kan khaw chhehvêl khaw kua aṭanga lo kal khâwmte an ni. A a khaw hla deuhthe pheii chuan In te luahin kan khuaah an rawn awm chilh a; tláng mi naupang bâkah kan khaw thenawma Vai naupangte an rawn kal hlawm bawk. Tûnah hian ringlo mi zirlai 69 kan nei mék a ni.

Kan naupang tam zâwkte hi an nu leh pa, zia leh chhiar thiam lo te an ni a, sikula an zir bâk chu in lama lo enpui

thei lo an ni deuh vek a. Nu leh pate hian an theih ang angin min *support* ṭha a, ringlo zíngah pawh nu leh pate aṭang chuan dodàl na kan dawnglêm lo. Naupangte tlawha kan kal kual cháng pawhin an fate zirtirtute kan nih avàngin min lo dawngsawng ṭha ṭhìn hle a, remcháng Pathian thu sawi leh ṭawngṭaite pawh kan tih theih phah ṭhìn a ni.

Kan naupangte hi kár khatah wawi thum *devotion* kan neihpui ṭhìn. Sermon, Bible cháng zir leh hla zir/zai ho tein hun kan hmang tlángpui. Ringlo naupangte kan neih avàngin an thinlunga Pathian thu a tam thei ang ber lo khâwl khâwmtír hi kan tum ber chu a ni a. Tûnah hrethiam rih lo mah se, an len hunah Pathianin an thinlunga thusawi nán a la hmang thei a ni tih hi kan ring ṭlat a; chuvàngin, kan ṭang ve hle a ni. Kan sikul naupangte aṭang hian nikum khán ringlo mi Baptisma chang pahnih kan nei a; an chhúngte ringlo mi la ni rih mah se la, kohhran

member rinawm leh ʔangkai rinawm tak a ni mék a ni.
tak an ni zui ve zêl a ni.

Sikul *devotion* bâkah hia n kum khatah vawi khat Gospel Week kan hmang ʔhìn a. Crusade ang chiin, speaker te neiin, a mamawh tán Counselling class te neihpuin hun hman ʔhìn a ni.

Kan zirtirtute zíngah hian kan sikul dín ʔan tih laia kan sikul-a lût ʔhìn, Hindu chhúngkuua mi, a pain Hindu puithiam ni tura a hual avànga Ashram-ah te sikul a kaltír a awm a. Chu miina a sawi chu – ‘Kan naupan laia kan zirtirtuten *devotion*-a Pathian hla min sakpui ʔhinte kha ka thinlungah a thi thei tlat lo,’ a ti. Chu chuan Pathian lamah a lung a tihlèn tlat avàngin kan sikul a chhuahsan tawh hnuah Ashram (*Hindu sakhaw inzirtírna hmun*)-a sikul a la kal lai chuan Kristianah a inpe a. A pain a remti lovin, nasa takin a dodâl a. Chuti chung chuan lêt leh duh tawh lovin tânah hian Missionary a lo ni ta hial a, kan sikul leh kohhran tána mi ʔangkai leh

Kan sikul hian a vawi khatna atán kumin hian Matric Exam kan hmachhawn ve a. Pathian zarah naupang 16 exam zíngah 15 an hlawhtling a. Star Mark pakhat, First Division pathum leh Second Division 11 kan nei a. Kan naupangte *result*-ah Pathian malsàwmna kan dawng nasa hle mai a, kan lawm êm êm a ni. Kan sikul naupang hluite zíngah hian Doctor pahnih an awm a; mahse, anni pawh kan sikul-a kum hnih khat lo kal, sikul danga zir zawm leh ta te an ni a. Middle School/High School kan neih hmaa Primary/Middle chauh kala, hmun danga zir zawm zui thei ta lo hi a tam zâwk an ni.

A tìr lama kan sawi tawh ang khian kan khaw chhúnga chêng, kan tláng mi-puite zíngah ringlo mi tam tak an la awm a. Anniho hi ‘a mawng khal’ kan tih ang deuh an nih ve na lai a awm tawh a, an intél ruh ʔha ve viau mai a. Amaherawhchu, anmahniah

hian Pathianin hna a la thawk ngei dawns a ni tih hi kan ring tlat a. A hlâwm deuhva an awm khâwmna véngah hian tûnah hian thawktu chhúng-kua pakhat chu harsatna leh dodàlna tam tak pal tlangin

kan indah lût tawh a. Tûn hnai khán Baptisma chang pakhat kan nei a; Pathianin hna a thawk zêl ang tih kan ring a ni. Kohhranhóten min lo ɣawngɣaipui zêl tûrin kan ngèn a che u.

George Romney-a (1734-1802) kha lem ziak thiam hmingthang tak a ni a. Kum 1756-ah England hmar lam khaw pakhata chêng Mary Abbot-i nèn an innei a. Khawpuia lem ziah hna thawh chu a hlâwk bâkah a tuina ber a nih avàngin chu chuan a lung a lèn hle mai a. Chutih nâk alaiin, Sir Joshua Reynold-a, a mi ngaih sàñ êm êm mai chuan nupui a lo nei mai a ui thu leh nupui a neih chuan uai rittu a neih dawns avànga talent ropui tak neì chung siin a thlen sàñ a beisei loh thu a sawi chu a lo hre ta a. Kum khat lek an inneih hnu chuan a nupui kalsanin, khawpui hrang hrangah a kal kual a. Lem ziak ropui tak tak a hnutchhiah a, sum pawh a hai lût hnem hle mai a. Miten a kut chhuak an ngai hlu a, mi zah kai tak a ni a. Kum 65 mi a lo nih chuan a hrisèlna a lo tla hniam a, hna a thawk thei lo va, a sum dínghmun a lo chhe ta bawh a, mahni mai chuan a inbuaipui thei ta lo va. A mangan tàwpah chuan a nupui chu a va pan leh a. A nupui chuan lâwm takin a lo pawm a. A thih hma kum hnih chhúng chu hmangaih taka enkawlin a lo bâwihsâwm a. A ɣat lai huna a zahawmna leh a sum zawng zawng aia hlu zâwk, a nupui rinawm tak chuan phatsan duh lovin hmangaihnain a lo kuangkua leh a ni.

Min hmangaihtu, Lal Isua hi kan duh zâwng tih kan duh avàngin kan kalsan a, a thínlung kan hliam ɣhìn. Mahse a hnêna kan kîr chuan min lo pawm leh ɣhìn a ni.



JAIRAMPUR BIAL RAWNGBÀWLNA

Rev. K. Lalbuatsaiha
i/c Jairampur Pastor Bial
Mobile No: 8014445003



Jairampur Bial hi Arunachal and Assam Mission Field 'East' huam chhúnga awm a ni a. Lakla Pastor Bial aṭangin kum 2016-ah a indang a; bial chhúngah harsatna a awm avàngin kum 2017-ah kalphung pangngaiin a kal ṭan thung. Pastor Bial chhúngah hian Kohhran Puitling pathum leh Preaching Station pariat a awm a, dàn zawhkim pawh 414 kan awm mék.

Pastor Bial Kohhrante hi Changlang leh Tirap *district* chhúnga awm an ni a, bial huam chhúng hi Km 100 laia zau a ni. Bial chhúngah hian thawktu: Pastor - 1; Evangelist - 10; Craft Teacher - 1; Field Worker - 4 (belh khâwm - 15) kan awm mék a ni.

Evangelist-te hian kan ni tin rawngbàwlina mai bâkah thla tin a huhovin ṭum hnih Prachar (out-reach) programme kan buatsaih ṭhìn a, a remchan dàn ang zelin Pathian thu kan hrih ṭhìn. Craft Centre hi kan bialin kumin aṭangin kan nei ve ṭan a, zirlai mi sawm an awm. An class ṭan hmain *devotion* kan

hmanpui a, nun kawng dik leh Pathian thu tak kan hrih ṭhìn. Pastor bial chhúngah hian hnam chi hrang hrang an awm a, ṭawng chi hrang pawh a tam hle. Kohhranah hi chuan hêng ṭawng pathum - Jugli, Hindi leh Assamese te kan hmang ber. Bial chhúng rawngbàwlina hi hnam hlâwm thumah a ṭhen theih a, chûngte chu: Tangsa, Nocte leh Adivasi te an ni. Hêng hnam lian pathumte zínga rawngbàwlina tlánpui kan tár lang dáwn a ni.

TANGSA: Changlang District chhúnga tláng mite hi 'Tangsa' tiin an ko va. 'Tangsa' tih awmzia pawh

'*Tláng mi*' tihna tho a ni. Tangsa chhúngah hian hnam hláwm hrang hrang 40 báwr zet a la awm a, chúngho chu ṭawng chi hrang hrang hmang an ni hlawm. Ṭawng chi hrang a tam avàngin a ram mite hian inbiakpawh nán Assamese leh Hindi ṭawng an hmang thei deuh vek a ni.

Kan bial chhúnga khaw pahni - Lungwaih leh Lungka te hi hnam hrang hrang inawm pawlh ni mah se, 'Jugli khua' tiin an sawi deuh ṭhìn. Inbiakpawhna ṭawng tual-léngah pawh Jugli ṭawng an hmang ber. Hêng khaw pahnihte hi Gaonbura (GB) awpna hnuaiah an awm a; khawtláng, hnam leh Sorkar thil pawimawh rël tùr a awmin rorèlna kaihruaitu ber a ni. NGO páwl an awm ve loh avàngin eng thilah pawh khaw GB mawhpurhna a sáng hle.

Lo neia ei zawng an ni tlángpui a; kuhva, thingpui leh Elaichi huan nei tlém an awm ve bawk. Ei leh in thuah Mizo te nèn kan duh záwng a inang hle. Thlai hnah chi hrang

hrang an ei hnem ve hle. Tuai thûr (bamboo tengnga) hi an uar hle a, chawhmeh tinréngah leh sa thlengin an thlák nam vek ṭhìn. Ṭhenawm khawvéng te nena inlèn pawh ṭhìn hnam an ni a, an thilphal hle bawk. Dâp in lian tak ah la khawsa tlángpui a, an khawsak phung pawh a la mâwl ve hle. Mizovin thingpui sen háng kan ngaina ang hian anmahni siam thingpui (phalap-khah) an ngaina hle.

Tangsa hnam hi a tam zâwk chu Kristian an ni tawh a, Kristian an nihna pawh kum sawmnga chuang a ni tawh. Ringtu puitling tak taka awm tawh mah se kaihruai an la ngai hle. Ringlo kan tihte pawh Buddhist sakhaw zuitute, pi leh pu sakhua leh Hindu sakhua zuitute an ni hlawm. Buddhist-ho hi Tikhak hnam an ni tlángpui a, Village Council hrang an nih hlawm avàngin an zínga rawngbâwl a harsa hle. Khaw GB te phalna la lo chuan hênggho zíngah hian Pathian thu sawi phal a ni lo. Hetiang a nih avàngin hian ringthar neih

pawh a harsa hle a, rawngbáwla kan chhuahna pawhin vai (non-tribal) ho zíngha a ni tlángpui.

NOCTE: Nocte hnam hi Arunachali hnam péng pakhat an ni a, Tirap district chhúngah an chêng ber. Pianphung leh hmélhmangah pawh Mizo te nen kan inang hle. Thingtláng lama chêngte hi a tlángpuiin lo neia ei zawng an la ni hlawm. An nun zia leh khawsak a la hniam hle a, nu leh paho phei chu zia leh chhiar thiam pawh an la awm meuh lo. Mizote anga thenawm khawvêngte inlèn pawh thìn an ni. Mikhual lawm an thiam hle a, an thilphal hle baw. An ina kan lèn hmasak ber tum hian an hnam tih dànin induhsakna thilpêk eng emaw kan keng thìn. Kan pi leh puten an thil neih an inthleng kual thìn ang khan Nocte-ho pawh hian thil neih inthleng kual an la uar hle. An nunah hian Toka pata (hnim chi khat) hi a bet tlat a, an inbul hnaiah an ching nasa hle. In leh lo tha deuh nei pawhin choka hi an siam ngei

ngei a, hêng hnah hi in chung atán an hmang thìn.

Nocte hnam chhúngah hian tawng chi hrang hrang hmangan la awm a, an tawng pawh an inhriat pawh meuh lo. Chuvàng chuan tawng tualléngah Hindi leh Assamese an hmang ber. Kristian eng emaw zât an awm nân a tam ber chu sakhaw dang (Hindu, Rangfrah, Pi Pu sakhua) zuitu an ni. Pi leh pu sakhaw zuitu an la thahnem hle a, Hindu intiho pawh hi pi pu sakhaw be chungah Hindu tih dàn thenkhat zui ta te an ni hlawm.

Kan Kohhran hian kum 2005 báwr chhovah Nocte hnam zíngha rawngbàwlna a lo tan tawh a; mahse, thawktu indaih lohna avàngin kum rei tak chhúnga chhunzawm thei lo. Tichuan, kum 2019 a tangin rawngbàwlna hma thar la chhunzawm lehin, tânah hian Nocte zíngha Preaching Station pathum leh thawktu Evangelist paliin rawng an báwl mék a ni. Nocte hnam zíngha kan rawngbàwl-

naah hian tûn thlengin harsatna kan la nei hran lo. An inah zalèn takin kan léng thei a, a tûl chuan Pathian thu te pawh kan sawi thei a, ãawngtaina te pawh kan hmang thei.

Deomali Area bîk hi Assam ramri hrûla awm a nih avàngin an khawsa zia leh nun dân pawh a vái tawh hle. Tribal zingah Hindu sakhaw zuitu pawh an ãhahnem tawh hle bawh. Ramkrishna Mission hian sikul hmangin rawngbàwlina hmun hrang hrangah an kalpui ve tho a; an sikulte an changtlungin hêng laia sikul an neih ãhatte an ni hlawm. Tláng mi Hindu-a lût tam tak pawh hi an mission hlawhtlinna niin a lang.

Sakhuana la thutak tak tak an awm laiin, a tam zâwk hi chuan sakhuana hi an la thutak vak lo niin a lang. An sakhaw rin dân han zâwt ila, a tam zâwk hi chuan fiah takin an sawi thei meuh lo. Hindu inti te pawh Mandir-ah pawh kal ngai lo te an ni hlawm. Tûn

dinhmunah chuan Nocte zingah hian rawngbàwlina zau takin a inhawng mék a, thawktu tam zâwk an zingah hian han indah thei ila, kan rawngbàwlina pawh hian rah tam zâwk a chhuah thei ngei ang.

ADIVASI: Adivasi awm-zia chu *Hnam hnuaihnnung ho* tiin sawi ila a fiah mai awm e. Mi hausa thingpui huan zau tak tak nei an tam hle a, hêng huan enkawl tûra an chhàwrte hi Adivasi an ni tlángpui. Kohhran membrete pawh hi thingpui huan enkawla chhàwrte an ni. An nunzia a la hniamin zia leh chhiar thiam pawh an la awm meuh lo. Pathian thu mai bâkah nun dân mawi leh ãha zirtír an la ngai hle. In leh lo pawh nei mumal lova an hnathawhna hmun hrang hranga pem kual ãhìn an ni a, member pawh a chángin kan ãhahnem deuh a, a cháng chuan kan tlém thei hle. Tin, an pute thu hnuai a awm an nih avàngin Pathianni ah pawh inkhâwm lova hnathawka an chhuah cháng a awm bawh.

Pastor bial a pian aṭangin Adivasi hnamho zingah hian rawngbàwlina neih ṭan nghâl a ni a. Tûnah hian bial chhúngah Adivasi Kohhran pathum an awm. Arunachali an nih loh avàngin Kohhran phuna kalhmang pangngai inzirtír pawh a harsa deuh. Evangelist ten Pathianni chawhmaah inkhâwm buatsaihin Pathian thu an hrih ṭhìn. Tin, an zínga ringlo an awm chuan an inah te kalin Pathian thu kan hrih ṭhìn a, a cháng chuan Isua film te kan enpuiin bawḵ ṭhìn. Adivasi zínga Pathian thu sawi hi a nuamin min lo dawngsawng ṭha thei hle.

Tlipna: A chung a kan sawite hi kan bial chhúnga

kan rawngbàwlina tlánpui a ni a. Ringlote ringtua siam mai bâkah Kohhran membrete kawng dik zirtír leh sawh ngheh hi kan hnapui ber a ni. Kan member paho zingah ruihhlo zu leh kàni ngawlvei kan nei nual a, sim harsa an tiin chhúngkua pawh an tibuai hle. Chûngte pual chuan kan thiam angin programme kan buatsaih ve ṭhìn a; mahse, a sâwt mawh hle.

Hetih mék lai hian bialah kumin chhúng hian ringthar chhinchhiahna chang mi 15 kan nei tawh a, kan lâwm hle. A tàwp berah chuan, kan bial chhúngah rawngbàwlina hma-bâk a la tam a; chhiartu zawng zawngte min lo ṭawngṭaipui ṭhìn tùrin ka sáwm nghál a che u.

Vawí khat chu pa fing tak pakhat, Kristian rinna chungcháng a sawisèl tùr dap reng mai hian Pastor pakhat hnénah hian, “*‘Jakoba ka hmangaih a, Esauva erawh chu ka hua,’ (Rom 9:13) han tih tawp mai chu a va mak ṭhìn êm!*” a ti a. Pastor chuan, “*Ni khawp mai. Mahse a eng lai chu nge mak i tih ber?*” tiin a zâwt a. Aní chuan, “*Esauva a haw tlat mai kha maw le,*” a ti a.

Pastor chuan, “*Keiin mak ka tih lai chu ‘Jakoba kha engtin nge a hmangaih theih?’ tih hi a ni zâwk. Engtin nge kei hi mi hmangaih theih? Pathian hmangaihna ropui tak aia mak hi a lo awm lo ve!*” tiin a lo chháng a.

LAL ISUA TÁNA MI RINAWM - PU PADAM BIKA (L)

Rev. Surendra Bahadur Gurung
i/c Katari Pastor Bial, Nepal Mission Field
Whatsapp Only: +977-9814218479



Nepal Mission Field chhúnga Katari Pastor Biala Katari Kohhran Committee-in Bhorle hmunah Chanchin Ṭha hrilin hma an la a. Chanchin Ṭha hrila an chhuahnaah chuan Pu Padam Bika hi an tawng hlauh mai a. Amah hi lo neia ei zawng, chhúngkaw harsa tak a ni nghe nghe. Ani chuan Isua Krista Chanchin Ṭha chu ngaithlain, Lal Isua neitu a lo ni ta a ni.

Kum 2007 khán Bhorle khuaah hian Preaching Station hawn a ni ta a. Pu Padam Bika hi an chhúngkuaah amah chauh Kristian a ni a. A lawina, Bhorle Kohhranah hian member an pung hlei thei lo va. Kum 2010-ah pawh khán member panga chauh an la awm a. Mahse, an tlèm avàngin a rinna a buai lo va, puitling tak leh rinawm takin hun a hmang ṭhìn. Mihring mihrinnaah pawh amah hi mi inngaitláwm êm êm a ni.

Chanchin Ṭha a hrilh ṭhìn a, inkhâwm tùr tein a sáwm ṭhìn. Mahse a chhúngte hian an pa thu sawi chu an ngaithla ṭha duh lo hle thung. A chhúngte hian an in chhúnga Pathian thu sawi pawh an phal lo. Mahse anin a sawi lo thei si lo va. An chhúngkuaah amah chauh Kristian a nih avàngin harsatna tam tak a tâwk ṭhìn a, a chhúngkua/laina hnai aṭàngin harsatna lian tak leh tihduhdahna te thleng pawhin a tâwk ṭhìn.

Pu Padam Bika hi Chanchin Ṭha hrilha chêt chhuahna apiangah a tel ve zêl ṭhìn a. A chhúngte a vei êm êm mai bawk a, a remchàn dân ang angin ṭhahnem ngai takin

Chhúngkaw pa ber a ni nachungin an chhúngkuaah lawm a hlauh lo va, a nupui leh a fate pawhin an be duh lo va, ngaihsak pawh an ngaihsak duh lo va, a nupui

phei chuan hmuh pawh a hmu duh lo. “Ka hmuh chuan ka thin a rim zêl,” tiin a nupui hian a sawi nghe nghe. Mahse chumi avàng chuan inkhâwm a thulh phah lo va, Lal Isua a phatsan phah lo va, a chhúngte tán chaw ngheiin a tawngtai fo zâwk thìn.

Hun a liam zel a, a fapa Mohan Bika pawhin nupui a nei ve ta a. Tùm khat chu a fapa Mohan Bika nupui, Gira Bika chu a dam lo vak mai a. Ramhuaiin tibuaiin, hlau-thâwng rêng rêngin hun a hmanga. Chu harsatna avàng chuan Lal Isua chanchin ngaithla lo thei lovin an awm ta a.

Tichuan, a pasala pa, Pu Padam Bika chuan Lal Isua Chanchin Tha - Lal Isua chu damna petu leh ramhuai chung a thu neitu a nihzia a hrilh a. An rilru tihvârin a lo awm ta a. Tichuan, a fapa leh a monu chu thingthiin Pathian hnênah a kùnpui thei ta a, a monu pawh chu a lo dam ta hial a ni. Tichuan Kum 2019 October thla khán a fapate

nupa chuan Baptisma an chang ta nghe nghe a ni.

Padam Bika hi Bhorle kohhran hruaitu a nih bâkah a remchàn ang ang a Chanchin Tha hril reng mi a ni. Amaherawhchu, a nupui hian Lal Isua chanchin a ngaithla duh lo mai ni lovin, ngaihlâk a hnêkin a thin a rim êm êm zâwk thìn.

Hun a kal deuh a, Nepal Mission Field chhúnga Khawchhak Presbytery Inkhâwmpui (2022) Dharan Kohhrana neih tùrah Katari Pastor Bial aṭanga kal tùr kan inbuatsaih sang sang a. Pu Padam Bika pawh hi Presbytery palai niin kal tùrin a inbuatsaih a. Katari aṭanga Bus lo kal tùr chu Bhorle-ah a lo châng a.

Chutih lai chuan vànduaithlâk tak maiin kawng sira a ding chu Bike-in a rawn su hlauh mai a, a na viau nghe nghe a ni. Tichuan Katari Model Hospital panpui vat a ni a, a theih anga thain an lo enkawl a. Amah tlawha kan kal pawhin harsatna kárah

pawh Pathian hnênah a
ṭawngṭai reng mai tih kan va
hmu a ni.

Katari Model Hospital-a
an enkawl thei loh avàngin
Biratnagar Medical College
ah *refer* a ni a. Chutia an
enkawl mék lai chuan a hliam
chu tuar lovin ni 13 October,
2022 khán he khawvêl hre-
hawm kalsanin vâh kohna min
chhânsan ta a ni. Kan ui hle
mai. Avuina hunah hian Katari
Pastor Biala ringtu te, an
chhúng te leh khawtláng mi
tam tak te chuan inthurual
takin thlânmualah a ruang
kan thlah liam ta a ni.

Pu Padam Bika inah
inkhâwmna hlawhtling tak
kan nei a. A nupui Pi Mangal
Maya pawhin a pasal zârah
Lal Isua chanchin a lo hriat ve
tawh thu leh a rin ve tawh
thute sawiin, ṭap chung a
Pathian hnênah ngaihdam dí

chungin Lal Isua Lal leh
chhandamtuah pawma zui
tùrin a intiam ta a ni. Tichuan
ni 29 October, 2022 khán
Bialtu Pastor kutah Baptisma
a chang ta a ni. Pu Padam
Bika rinawmna leh ṭhahnem-
ngaihna avàngin an chhúng-
kuain Lalpa neitu an lo ni ta
hi a ropui êm êm a ni. A
nupuiin baptisma a chang lai
ngei han hmu ve se a làwm
dâwn nèn. Mahse Krista neitu
a nih angin a thihna pawh a
nupui tán damna, Lal Isua
hnêna a thlenna a ni hi kan
lawmpui êm êm a ni.

Pu Padam Bika thihna
hian a chhúngkuaah Lal Isua
chanchin a la sawi zel a ni. Lal
Isuan '*Thih thlengin rinawmin
lo awm rawh*,' (Thupuan 2:10)
a tih angin Pu Padam Bika
hian rinawm takin a Lalpa a
zui a, a thih thlengin a Lalpa
tána mi rinawm leh
rawngbáwlto ṭangkai a ni.

A mi thianghlimte thihna hi
LALPA ngaih chuan hlu tak a ni (Sam 116:15).

Thih thlengin rinawmin lo awm rawh; tichuan, nunna
lallukhum ka pe ang che (Thup 2:10).

ENGTIKAH NGE I PENSION DÁWN?

Lalpanliani

Evangelist, Masihi Sangati (Meitei)

Mobile No: 9678188051



Missionary tùra min thlah ní leh Mission Field kan thlen ní te kha hmânní lawk angin rilruah a la chiang a. Amaherawhchu, hun a lo rei ve ta a ni ang, kan thupui 'Engtikah nge i pension dáwn?' tih zawhna hi ka dáwnng zing ve ta hle mai. Missionary-te zingah a thawk hlâwk lo leh tawnhriat nei tlém ni mah ila pension dáwn thlenga Pathianin min khawngaihna leh hruaina hi a ropui ka ti a; ngawi renga han pension chu a uiawm êm a, rawngbàwlinaa ka tawnhriat tlém leh mâwl tê tê ka han zia ve râwih a. Pathian hnêna làwm thu sawina leh amah faknaah lo chang mawlh rawh se.

March 23, 1989 (Ningani) kha ka theihnghilh tawh loh tùr ni - Pathian rawngbáwl tùra Manipur khawpui Imphal ka rah ni a ni.

Ningthoukhonga kan awm laia chhúngkaw pakhat Pathian thu kan hrih te chuan pathian chi hrang hrang lem an tár a, Isua lem pawh an tár tel a. An nula chu sakhaw mi tak a ni a. Tum khat kan han léng leh chu an nula chuan a țawngțainaah Isua nge Pathiana a vawn tùr zâwk, *Krishna* (Hindu pathian) tia a zawh chu, a rilruah *Krishna* a

len zâwk thu a sawi a. Tichuan țawngțai rual kan rawt a, kan țawngțai ta vat a. Ka țawngțai kan han 'Amen' chu, nula chuan a Pathian atana Isua a duh thu a sawi ta mai a, kan va làwm êm! An pathian lem tär te chu kan pawt thla a, Isua lem chauh a intär ta. Kha mi nia kan hlimzia leh làwmzia kha aw!

Tichuan, an chhúngkuuaa mi tam zâwkte chuan baptisma an chang a, tün thleng pawh hian ringru țha tak an la ni zêl. Ningthoukhongah vêk hian a tlangval laia

Kristian lo ni tawh, mahse drugs ngawl vei vanga AIDS veia mitdel ta a awm a. A nupui fanau te erawh kristian an la ni lo va. An ina kan lèn hian Pathian fakna hla a ngaithla châk thìn êm êm a. Tûn laia Smart phone-a hla han *play* mai theih ang kha kan la hmang si lo va. A bulah chuan ka zai ve hlarh hlarh thìn a. Fiamthuìn '*Ani bulah kha chuan Routmawi ang mai ka ni e,*' ka ti thìn. A nupui fanau te Pathian thu kan hrilh zêl a, an chhúngkuain ringtu an lo ni ta a ni. Lalpa ropui rawh se!

Bisenpur-a kan awm laiin kan bial chhúnga Khoijumana nu, la naupang tak mai Madonnai chu *cancer*-in a ná a. A dam loh a zual deuh chuan bial chhúnga ringtute kal khâwmin kan tawngtâisak a, kan zai bawktâin. A hla duh zâwng kan sak chuan a hmuì phunin a lo zàwm ve thìn.

A thih ni a lo thleng ta a, ringtute an inah pung khâwmin kan tawngtâi ho leh a. A mutna pindanah ka va lût

a, a lo chau tawh êm êm a. Amaherawhchu, a hriatna a la fim takin, tiin a beng bulah Pathianin a hmangaihzia te ka hrilh ve mawlh mawlh a. Nakínah chuan a lo chau zual a, a pasal chu ka bulah a lo kal a. A nupuiin thihna lui a dai kai mai thei lo chu a khawngaihin, en har a tih thu mirawn hrilh a.

Tichuan, a nupui chu Pathian hnêna hlan mai a phal tawh em tih ka zawhna chu '*Phal e, ka khawngaih êm mai!*' a tih tâk avàngin Pathian hnênah Madonnai chu kan hlân ta a. A hnu rei lo têah awlsam takin a kal ta a ni. Hindu chu ni se páwnah an zâwn chhuak vat ang; mahse, ani hi chu an khumah fel takin an buatsaih a. Thenawm ringlote chuan hmuhnawm enin an lo en a ni. Kha mi ni kha ka dam chhúng hian ka theihnghilh theiin ka ring lo.

Thih thu han sawi chuan Kumbi-a kan awm lai, fa pawh ka la neih hmaa thil thleng kha ka theihnghilh thei lo bawka. Ringtu pitar, kan Mei-

tei Kohhran Upa te chhúng, damlo hi kan tawngt̃aisak a. Chu Kohhran Upa chuan damlo chu ka malchungah mi pawmt̃ir a; tichuan, kan tawngt̃ai ta a. Kan han tawngt̃ai zo chu damlo chu a lo thi ta dêr mai a, ka hrilh a hai angreng khawp a. Tûn hnua ka han ngaihtuah leh hian, Upa te khân damlo kha thi mai tùr tih an lo hria ang a; Missionary malchungah a thih kha an ngaih a lo t̃ha a ni ang te, ka ti ta zâwk a.

Manipura kum 22 kan awm hnuin, Arunachal & Assam Mission Field West-a Laimekuri khuua Jubilee Model School-ah zirt̃irtu tùrin sawn ka ni a. Manipur ațanga kan awmna thar tùr hi kal pangaiin ni hnih kal a ni a; mahse, kan motor hman a fuh loh deuh avàngin ni li lai kan thang a. Thlen hma ațangin kan Field hotute kan tibuai nghâl a. Kan chhúngkua min rawn buaipui tùrin Field motor-in *Driver* leh *Evangelist* te an lo kal a, kan va han lâwm tak êm!

Heta kan insawnaah hian kan *suitcase* lian, ka puan bih chi leh kawrlum ka dahna chu a bo daih mai a; thla eng emaw zât chu inkhâwmnaa puan bih tùr nei mumal lovin ka awm a. Ka thil bote chu ka ui êm êm t̃hin.

A m a h - e r a w h c h u , Pathian hausakna zâr ka zo va – Thenzawl lam ațangin kan rawngbâwlpuite kal tlangin puan tam tak ka dawng a. Tin, ka chhuahna Kohhran, Ramthar Veng Kohhran Hmeichhia ten puan an rawn thawh khâwm bawk a. Ka neih phâk loh tùr t̃ha tak tak, a rawngbâwltu ka nih ve avànga Pathian malsâwmna ka dawngte hi ka va han lâwm tak êm!

Kum 22 lai Evangelist-a ka awm hnuah zirt̃irtu hna chu kum 8 ka han thawk ve a, ze lo deuh mah ila a nuam ka ti t̃hin. Naupang tam tak te hmaa Lal Isua chanchin hrilh hi a nuam ka ti a. Anmahni tawng kan hmang lo va, English mawl tê t̃ein kan sawi

thin. Hriatthiam tâwk an nei thin a, baptisma chang pawh an awm ve zauh zauh a ni. Naupang bula awm hi hahthlâk deuh cháng awm mah se a hlimawm viau thin. Tûm khat chu zirtirtu kal lo ai Class III-ah ka va lût a. Ka chhuah dâwn chuan tlar hmaa thu mipa naupang pakhat hian an class-a lût zêl tûrin min ti reuh va. Kei chuan a duh chhan ka zâwt kher kher a; nui sen sen chungin ‘Love’ a ti reuh va, a làwmawm duh khawp mai.

Laimekuri-ah hian Lalpan tawnhriat tam tak min pe leh a. Kan rawngbàwlinaah hian Assamese tawng an hmang a, a har ka ti ngei mai. Tawng thiam leh thiam lovin Kohhran Hmeichhiaah te hruaitu han nih ve te a ngai a. A zia en nawk nawkin Inkhâwmpui rorèl te kan han kaihrui ve a; *‘Lalpa hi a thain, a va duh tui lo êm!’* te ka ti thin. Laimekuri-ah hian pitar, rei tak zeng, kawm tlat tawh a awm a. Tûn hma chuan ramhuai a hlau thei êm êm a,

Lal Isua a rin hnuah chuan a hlauhna a bo va, a hlim ta êm êm a. Lal Isua chanchin a lo hre har kha pawh a ti hle a ni. Chhiar thiam lo mah se Bible tê (Sâp tawng) a nei a, chu chuan a taksa na lai a dep thin a ni.

Kum 2020-ah chuan Arunachal atangin Barak Area chhúnga Gossaipur, Meitei Kohhran awmnaah Evangelist tûra sawn kan ni ta a. Kan tawng hman thiam ve Meitei zínga rawng han bàwl leh theih chu nuam kan ti ngei mai. Kan awmna hi leilet zau takin a hual vêl, hmun reh leh fál tak a ni. Biak In leh kan chènna quarters pakhat chiah a awm a, thenawm kan nei hla hle. Pathianni apiangin hlim takin kan inkhâwm thin a; inkhâwm lote chu an inkhâwm theih loh chhan nèn lam kan inhre vek thin a ni.

Pension thlenga kan awmna tûr emaw tih laiin Aizawl lamah Masihi Sangati (Meitei) Evangelist tûra sawn kan lo ni leh ta a. Gossaipur

chu ngai êm êmin kan kalsan
leh ta. Kan insawn ni kha áw!
Lung a va lêng êm!

Pathian khawngaihna
leh hruainain kum 35 lai (1989
-2023) Missionary hna Lalpan
min lo thawhtír ve hi ka
lâwmin, phu lo ka inti tak zet
mai. A khawngaih rawngbàwl
hna ka thawh ve azára
Kohhran, chhúngkhat laina leh
thênruual te min duhsakna,
tawngtaisakna, thawmhnaw

leh sum leh pai thlenga min
vûrna te hi ka va phu lo êm!
Missionary khawvêl - inhma-
ngaihna leh induhsak tawnna,
pianpui unau ang maia
khawsak hona, a thlum a al
ei zana hmuna kum 35 zet han
awm chu rilru leh thlarau hian
a va ngeih tak êm!

Piang nawn thei ta ila,
he Chanchin Ṭha hriltu (Mis-
sionary) hna bâk hi thlang thei
hian ka mawi lo ve.

Pa pakhat hi a fapa nausén dam lo enkawlina Damdawi Inah
chuan rilru thlaphâng tak leh mangang êm êm hian a awm a. A cháng leh
a ṭap a, a cháng leh a vei kual a, a cháng leh a ṭhu kun tlawk tlawk mai a.
Nakinah chuan heti hian a ngaihtuah ta a: *'Ka fapa hi lo thi dáwn ta sela;
ka thinlung natna chhan ber tùr leh ka tuarna chhan ber tùr hi eng nge ni
ang le?'* tiin. A fapa chuan a tán thil ropui eng mah a la tihsak lo va, amah
pawh chu a la hre lo; mahse, chu a pa chuan a thinlung zawng zawngin
a hmangaih si.

A tàwpah chuan *'Ka fapa hi lo thi dáwn ta sela, amah ka
hmangaihzia hre ngai rêng rêng lova a thi tùr hian min tina ber ang,'* tiin
a ngaihtuah ta a.

Chutah chuan a
thinlungah fiah takin, *'Hei hi Pa
Pathian rilru a lo nih ngei hi. A
fa, a hmangaih êm êmten
anmahni a hmangaihzia hre
ngai rêng rêng lova chatuana
an boral tùr hian a tina a ni,'* tih
thu a lo thleng ta a.



SA EI AI RAWNGBÀWLNA

Upa R. Zodingliana

Dawrpui

Mobile No: 9436140810



Kum 2003 March thlaa Dawrpui Kohhran Ramthar Committee thu khâwm chuan ‘*Ramthar Field hrang hranga hma kan lâkna atán Kohhran chhúngkua-ten thla tina Pathianni vawí hnihnaah kan Sa Ei Ai lâk khâwm ni se’* tiin a rél a. Hemi atán hian Báwm bîk siamin July, 2003 aṭangin lâk khâwm ṭan a ni.

Hun lo kal zêlah ‘*Kan Kohhranin ramthar rawng-bàwlina atána kan puala hman tùr aiin a bîk taka Chanchin Ṭha puan darhna (Direct Evangelism) atána kan Synod Mission Field leh rawngbáwltu dangten an lo hman atána lâk khâwm ni tawh se’* tia rèl niin, July, 2005 aṭang khán vawíin thlengin hetiang hian kalpui a lo ni ta a ni.

Tichuan, he ‘*Sa Ei Ai’* rawngbàwlina hi a enkawl hna Ramthar Committee-in tum zêlin, anni hian lâk khâwma, Báwm hùn hmain khawí atán nge tiin an lo rél fel hmasa ṭhìn a ni. A tìrah chuan thla khat tê tê atán tih ṭhìn a ni a;

mahse, duh aiin thilpêk a bei-tham deuh avàngin thla hnih chhúng zêla lâk khâwm chu Field/hmun pakhat tán tân thleng hian tih a lo ni ta a ni.

Kan Synod Mission Field chhúnga Chanchin Ṭha puan darhna atána an mamawh anga hman tùra pèk cháng a awm a, Field chhúnga Bial emaw, Post bik emaw tána lâk khâwm cháng a awm bawk. Hemi bâkah Para Church-a kan Kohhran member-te thawhna hmun hrang hrang atána lâk khâwm cháng a awm bawk a; tin, a tìr tê, kum thum chhúng chu CONCERN rawngbàwlina atán lâk khâwm a ni. COVID-19 hripui léng avànga ṭum 13 kan lâk theih

loh tel lovin a tìr, July, 2003 aṭanga August, 2023 chhúnga he Sa Ei Ai rawngbàwlina atána kan lâk khâwm tawh zawng zawng chu ₹ 44,64,371 lai tling tawhin, hmun hrang hrang 82 atán lâk khâwm a ni tawh bawk a ni.

He rawngbàwlina tláwm, mâwl leh ho tak anga lang hmanh hian Pathianin a ram nasa taka zauh zêlin, a hmangtute pawhin ṭangkai taka hmangin, Lalpa Beràm huangah mi eng emaw zah khung luha lo awm tawhin, ringtu tam takin chak tharna an lo hmuh phah tawh a. Tin, he ‘Sa Ei Ai’ hmanga rawngbàwlina rah chhuah (result)

han hriatin Kohhranhote Pathian Ram ṭulna min hriat thartír a; he rawngbàwlina-a tel min phalsak avàngin Pathian hnênah làwm thu kan sawi ṭhìn a ni.

Pathian Ram ṭulna a nasa si a, kan Synod Mission budget ringawt chuan min daih tak tak thei bawk si lo. Field tina post tin mai hian Lalpa Beràm huanga hruai lût tura an beihnaah, ṭawngṭaina mai bâkah sum an mamawh vek bawk si.

Chuvàngin, a thei Kohhran chuan hetianga ‘Sa Ei Ai lâk’ khâwm hi ti hlawm ta ila, a va han làwmawm dâwn êm!

Pa hausá tak hi chau takin khumah a mu a. A thih hun a thleng ṭêp tihah chuan a fanu, naupang tē chuan, “*Pa, i kal bo daih dâwn em ni?*” tiin a zâwt reuh va. Aní chuan, “*Aw Bawih tē. Ka kal bo hunah chuan min hmu thei tawh dâwn lo asin,*” tiin a lo chháng a. A fanu chuan, “*I kalna tura chuan in nuam tak leh ṭhian tam tak i nei ang tiraw?*” tiin a lo zâwt leh a. Aní chu a ngawi vang vang a, nakín deuhvah chuan, “*Ka lo va â tehlul êm! Hetah chuan sumdâwnna hlawhtling tak ka nei a. Ka kalna tura chuan mi rethei tak ka ni dâwn a ni,*” a ti chuai raih a.

“...vànah, sùlrûl leh tuiêkin a ei chhiat lohnaah, rûkruten an reh pawha an rûk hek lohnaah chuan, in tán rote khâwl khâwm zâwk rawh u.”

RAMTHAR NI AH RAMTHAR KAN HNATLÁNG

(Ramthar Committee hma lâkna tlángpui nèn)

*Upa R. Lalfakawma, Treasurer
Bairabi Ramthar Committee,
Mobile No: 8974241393*



Ni 31.8.2023 (RAMTHAR Ni) khan Bairabi Kohhran Ramthar Committee te chu kan Biak In bula Ramthar Kuhva huanah Kuhva tiak phun belhin kan hnatláng a.

Kuhva tiak eng emaw zah kan phun belh a ni. Biak In bul kuhva huan hi Kohhran Committee-in Ramthar Committee te min enkawltírin, a thar ang ang pawh Ramthar Committee-in Missionary chàwm nán kan hmang a ni.

Kumin 2023 hian kan Kohhran Ramthar Committee hian SMB kal tlanga Missionary kan chàwm zât chu 85 a ni a. Tin, Bial anga kan inchàwm tãwmnaah pahnih leh a chanve ang kan chàwm/thawh ve a; tin, Arunachal North Mission Field-ah Kraws Sipai pakhat kan chàwm ve bawk.

nán Kohhran In tinin ‘Rinna Thutiam’ thla tin kan thawh khâwm thìn.

2. Ramthar Committee-in Thawktu chàwm nán Bazar-ah ***Ramthar Thingpui Dawr*** siamin, chawlhkár khatah Bazar ni (Nilaini apiangin) Dawr nghâktute ruatin, kan inngah chhâwk thìn.

3. Ramthar kuhva huan kan neih lai hi a panna kawng a buaithlâk deuh avàngin kan hralh a. Kuhva huan thar tùr ram, tín li hmun zet tùr kan lei a. Kum thar (2024) ațangin hma thar lâk kan tum a ni.

4. Ramthar Committee te sum tuak nán inhlawhna remcháng apiang - Balu phurh, Huan sam, Lo vah,

ṬAN LÂK DÀN TLÁNG- PUI TE:

1. Missionary chàwm

Thing phurh, etc.-ah te kan
hnatláng thìn.

Pathianin, tling lo leh
beitham taka kan Chanchin
Ṭha rawngbàwlna te mal a
sàwm a. Vawiin thlengin
Thawktu chàwmna kan la tlin
ve thei te leh Pathian ram
zauh nána kan chîm chinah
hma lam kan la pan ve zêl thei
te hi Lalpaah kan lâwm ve êm
êm a ni.

5. Thla tàwp Inrinni zàn
hnunngber hi Ramthar pual
inkhâwm hun atán kan hmang
thìn a. Ramthar pual thawh-
làwm te la khâwmin,
Chanchin Ṭha rawngbàwlna
lam hawi - Rilru sawi leh
Ṭawngṭai rual, Sermon leh
Thiam thil theh khâwm, etc.
tein hun kan hmang thìn a ni.

Pathianin a ram tizau zel
rawh se.

HRIATTÍRNA

Kum 2023 chhúngin a hnuaia tàr lan ang hian Synod Revival Camping Centre, Sihphir Neihbawi-ah Synod Revival Committee-in Camping a buatsaih dâwn a. A duh tán luh theih a ni ang. Registration Fee ₹ 100/- a ni ang. Mahni mi mal mamawh hrang hrang bâkah Mut bu, Bible, pen leh *note* bu ken tùr a ni a. Ruihtheih thil ken luh phal a ni lo va. Mobile Phone pawh ken luh phal a ni lo. Thawhlehi-ah luh tùr a ni a, Inrinni-ah chhuah tùr a ni ang.

1. Dt. 10-14 October, 2023
2. Dt. 7-11 November, 2023
3. Dt. 5-9 December, 2023


(REV. C. ZORAMMAWIA)
Senior Executive Secretary
i/c Revival

Special Issue

CHANCHIN THA HRIL LEH SANGHA TLÁNG VUAK

*Rev. Lalrintluanga Ngente
Administrative Secretary,
Barak Area Church & Mission
Mobile No: 7630077948*



Hmân lai leh tûn lai pawhin thianzaho emaw, khawtláng huap emaw pawhin Ru hmangin sangha vuak thìn a ni a. Ru chu in lamah emaw luidung hmun remcháng leh lung khuarah te déng sawmin a huhovin vawilehkhatah tuiah an chiah thìn a, chu chu sangha tláng vuak step hmasa chu a ni. Ru chu in lam aṭanga den sawm sa an ken loh pawhin lung khuar kík kék, Ru denna tûra remcháng tak ‘lungsûm’ an tihah an déng bawk thìn a. Chu ru denna lung khuar chu ‘Rusûm’ an ti bawk thìn. Chutah chuan Ru chu an déng thìn a ni. Sangha vuak hi a hlimawm hle thìn. sangha tláng vuak chu hlawhchham pawhin a hlimawm a, hlawhtlin pheih chuan Mizo khawtláng nuna hun hlimawm leh nuam ber te zínga mi a ni.

Sangha vuak hlawhtling tûrin thil tam tak tih tûr a awm, chûngte chu:

(a) Tlángauvin khaw mipuite hriattír an ni a; chhúng tinin Ru/khang an zawng a, a ni ruatah chaw fûnin an thawk chhuak thìn.

(b) Rorèlna fel tak neih a ngai a, Vál upaten rèl fel hna an thawk ber thìn.

(c) Ru chiah hun te, sangha dap hun te, khàr pin thlengin inthuruala thiltih ngai vek a ni. Lo hmanhmawh fál

deuh bîk an awma, mi aia hmaa lo chiah an awmin; Ru a chak tûr angin a chak tâwk lo va, hlawhchhamna bul a ni fo.

(d) Ru neih mil tâwka chêtîlâk thiam a pawimawh a, ru tlém têa lui lian vuak chu hneh a har. Kan thiam loh chuan ru da thak pawhin chiah ila, ei khawp kan hawn chuang lo vang.

Vàn lam Tlángau: Vàn-tirhko hho inkhâwmpui chuan leiah mi sualte zawnga

chhandam tùrin Isua Krista an rawn tít a. Vàn mite chuan Chanchin Ẹa Rusûm an rawn thlâk a. Vawiin thlengin chu Ru chuan hna a la thawk reng a, Sangha tam tak a la man reng a ni. Ru hmanga Sangha man avàng chuan vana mipui, rusûm thlâk tùra tirtute ngei mai chu an hlim êm êm Ẹhìn a, an tel ve rem lo mah se, an bih thla hrâm hrâm Ẹhìn a ni àwm e. Fakna hlain, *“Mi sual sim ten a hnên an pan laiin; Vàn tirhkohten bih an duh Ẹhìn”* (I Pet 1:12) a lo tih bawk kha.

Mizoram Synod Mission Board chuan India ram hmun hrang hrang leh ram páwn thleng pawhin Chanchin Ẹa Rusûm kan thlâk a, Chanchin Ẹa Sangha Tláng Vuak hna kan thawk mék a ni. Hêng rawngbàwl hna kan thawh lai hian kan sangha tláng vuak a hlawhtlin theihna tùrin kan thawh mék dàn aẓang hian inen lêtna tùr thu Ẹhenkhat i lo thlir ho dâwn teh ang.

1. Ru chakna mil tâwka hma lâk: Chanchin Ẹa hril a Ẹtûl a, Ẹhahnem kan ngai

a, kan bei nasa hle mai. A Ẹtûl tih vânga a chê apiang bawh ngawt chu hlawhtlin a harsa ang. Kan hma lâk mékna pawh a fahrah puan hlai thei. Kan thawh chhuah mila hma kan lâk a pawimawh. Sênso tam tak, sangha man chuang si lo a awm theih. Lui lian aiin lui tê hneh a awlsam. Mumbai thlarau bo leh Silchar dai thlarau bo hlutna a inang reng. Hneh Ẹha mang si lova kan bawh zau lutuk chuan hlawhchhamin kan haw ang a, kan nupui fanau ten sangha ei tùr an nei thei lo vang.

Ringtu kan siam a, sawh nghet hman lovin kan insawn-san a, sum tam tak seng e ti lovin kan insawn nasa lutuk hian sum lo thlâwna hmanna a tam phah a; tin, enkawltu, hotu chan chang kan insawn nasa bawk. Ẹawng thar zir tùrin thawktu kum upa tawh te kan sawn dàwr dâwr a. Ẹawng lovin rawng kan báwl thei tak tak si lo va, keimahni leh keimahni harsatna kan insiam nasa. Kan ru chakna mil tâwk kan ngaihtuah thiam a Ẹtûl.

2. A chak tâwka insem

darh: Lui dung tluana bawh mai aiin kan Ru ken zât mila kan hneh tùr chin tâwk kan hriat a pawimawh. Kan thlen chin dik tak hre tùr te, Area inching fel tâwka òthen sawm te, kan thawhna hmun a zira thawktu sem rual te a pawimawh. Thawh dân thuhmun, hmun khata awm dân te hi harsatna thlentu a ni fo. Páwl òthenkhat thawh anga ringtu siam hna ngawt thawk kan ni lo va, chakna nei kohhran, mi dangte hnêna hril chhâwng thei kan siam a pawimawh.

Committee òthin leh Inkhâwmpui òthin kan ni a, Minute ziah dân inzirtír te, sum enkawl dân inzirtír te, kohhran nun zia leh rawngbâwlina inzirtír te leh a dangte pawh kohhran puitling ni tùra kaihhruai hi a pawimawh. Ti diar duara hma kan lâk hian ti ve reng sia, thawh rah lang si lovin rei tak a awm theih. Sangha man mang si lovin kan hah viau thei.

3. Sangha tamna bawh fuh a pawimawh:

Chanchin Ṭha dawng tùra inhawng bawh fuh a pawimawh. Sangha awm ṭha mang lo leh li thûk lutuka sangha hneh a harsa. Li páwna man hmasak hian li thûka mi pawh man a awlsam. Rawngbâwlina tlâk natna hmun deuh bîk a awm òthin. Chumi kalsana, hma lâk zauh vaka, man mang si loh ai chuan hnaivaia man awlsam deuh kan thlan thiam a pawimawh. Lui kâwi sarih vuaka hlawnchham ai chuan lui kâwi thum hneh taka vuak pawh hlawnhtlin a awl. Kan thlen chin hi sawh nghet ila, puak chhâwng puak angin kohhran kan sawh ngheh kohhran chuan an hril chhâwng ve zêl ang a, kan thawk sâwt deuh mahna. Khawvêl hi a zau êm mai a, keini mi sâng chuang êrh âwrh tán hneh zawh rual a ni lo.

Kan kohhran din tawhte tâ tichaka, hril chhâwng ve thei kohhran nghet leh puitling kan siam tam a pawimawh.

4. Kan ru hman leh kan lui bawh a inmil em?:

Chanchin Ṭha rusûm kan thlâkna hmun hi hmun hrang hrang, ṭawng

leh hnam zia hrang hrang hmanna hmun a ni. Anniho hi a hnam hnam hian insawn kual sek thìn ni se chu an awmna hmun apianga um zui ve mai chu a sual lo vang. Amaherawhchu, chùng hnam insawn kual ve ngai hauh lo zingah chuan kan zu insawn kual ta sek mai thìn si a. Tawng lovin rawng a bàwl tak tak theih si lo. Kan Missionary-te pawh kan sawn luhai nasa êm êm mai a. Tawng thiam bik êm êm pawh nei hman lovin an che zing a. A sangha tak rui hman lovin kan ru chu kan chiah rei lo lutuk a, kan insawn luhai zo va, kohna da thak khawpin kan che sek mai a. Kan ru hi lui chi hrang hrangah kan chiah lăwr nasa lutuk a, a da zo niin a lang a; kan sên tam aiin kan thar tha lo hian a hriat a ni.

5. Ngáwidan li vuak :

Hun hmasa lamah chuan khawtláing Ngáwi an dawh thìn. Lui remcháng laiah Ngáwi chu an dawh ber a. Tui lian denchhena sangha, lui mawng lam pan tùr leh sangha khawlai léng tam tak an tla thìn. Thálah chuan tui a lo kám a, ngáwidan lí-ah te chuan sangha an léng huai

huai thìn. Chùng sangha khawlai léng, lui mawng lam chhuk thei tawh si lo te chu an táng thup mai a. Lui hnár lamah; Ruin a hneh tâwk tùr awm vêl a tângin an chiah a, sangha rui chu an tal but but mai a. Ngáwi hmanga dan beh tlat an nih avângin man an awlsam bik thìn a ni.

Sangha tláng vuak nawm leh hlimawmzia hretu chuan an zawngchhang a, kum thar thál khawro an ngâkhlel a; an zawngchhang thìn kha a ni a. Chanchin Tha rusum kan thlâk dân hi ngun zâwka en that te hi inhuam ila, ko thlâk a ngaih pawha thlâk ngam tùrin I inbuatsaih teh ang u. Ru tél phur tēuh si hian sangha ei tlâk aram hi kan hàwn lo palh ange. Hawh teh u, i ngaihtuah tláng teh ang u. Kan Zosâp Missionary-te kha chuan min rawn bitum chat mai kha a ni a. Vawiin thlenga hril chhâwng thei kohhran kan lo ni ta mai hi Pathian hnathawh tih loh rual chu ni lo mah se, min hringtute khân mi ngaiin min thut chilh tha êm a ni.



SYNOD HNUAIA ZIRNA HMUNTE KA TLAWH VE A

H. Darrozama
SMB Headquarters Office
Mobile No: 9862417006



Synod hnuaia ka thawh tàwp kum te ka lo thleng ve ta dêr mai a; hun tàwp lamah Mission Board lamah te ka han thawk ve ta zêl bawk a. SMB hnuaia ka thawk ve hi làwmawm ka ti a, kan inpawhin kan inngaihsak tawn a, kan inring tawn êm êm mai a; pension pawh min hrehtír hialin ka hria.

SMB rawngbàwlina hmun hrang hrang te tlawh ve hi ka châk thìn a, han kal ngawt ngaihna a awm si lo va. Mahse Pathianin hun remcháng tak mai min ruahmansak ta hlah mai a, ka làwm ngei mai. Ni 1-6, May, 2023 chhúng khán Assam Field, Arunachal & Assam Field West leh North chhúnga school te tlawh tùrin kan hotute remtihna Pu T. Lalchhuang-liana, SoS (SMB hnuaia sikul zawng zawng enkawltu) hnung zuiin ka kal ve hlah mai.

May ni 1-ah Lengpui aṭangin Guwahati kan thleng thla a, Airport-ah Assam Field Office Driver fel takin min lo hmuak a. Field Office-ah kan thleng pheii a, Field Secretary, Rev. Billy Lalrinchhana te

chhúngin min lo dawngsawng a, hah a dam sawng sawng mai. Zanniah tuihnai tak mai kan ei a. Zannah hian Réla Madhuripathar pana kal tùr kan nih avàngin Pu Billy-an ṭawngtai-in min thlah a, a thlamuan-thlák hle mai.

Zàn dár 8:30 vêlah chhuakin zing dár 7:00-vêlah Rél Station-ah St. Peter High School-a thawktu Pu Nunhlina leh Driver ten min lo hmuak a, a hlimawm thìn khawp mai. Compound kan thleng pheii a, kan inngat a, thawktute nèn kan inchi bai a. Thawktute chènna tlawhin kan chhuak a, hmuh an nuam hlawm hle mai. Sikul *building* thar kan fang a, a *building* leh a *compound* a zau nuam êm êm mai a, insawn luh hun a nghahhlelhawm duh hmèl

khawp mai. Tûkthuan kan ei zawhin tûna sikul awmnaah kan phei a. Pu Chhuangan tih tùr tûl te a tih zawhin thawktute nèn inkawm hona kan nei a, ngaih-hruina *muffler* min bahtír a.

Tthla te kan lâw zawhin Jubilee Model School, Simenchapori panin Pu Siam, Headmaster, St. Peter High School motor-in kan kal leh a. Simenchapori-ah hian NI. Chhantei, Headmistress hovin min lo làwm a. Sikul te fan zawhin inkawm hona neih a ni a, ngaihhruina banga tàr chi lukhum ang deuh leh *muffler* min pe leh a. Simenchapori-ah hian zàn kan riak a. *Compound* a zau nuam hle mai a, thawktute chènna pawh a fel fai hlawn hle mai. Zànah Headmistress chènnaah zirtírtu te nèn inkawm ho leh a ni a, rawngbàwl naa an harsatna te an sawi chhuak a; tihsak theitu nih a châkawm khawp mai.

Zànah tui takin kan mu a, Zíng dár 6:45 vêlah Pi Chhantei motor-in Laimekuri panin kan kal leh a. Tluang takin zíng dár 7:00 vêlah kan thleng a, Pu Ringa,

Head-master ten min lo dawng-sawng a. Tûkthuan kan ei khamin zirtírtuteho *training* neihpuin Pu Chhuanga chu a awm a. Hun serh hmannaah thilpêk hlu tak mai Arunachal chem sei ngaihhruin nán min pe a, ka va han làwm teh rêng êm!

Hun serh hman zawh hian kei chu ka chhuak a, Pi Chhantei te motor-in Jonai-ah kan kal a. Bank te a dawr zawhin Pasighat-ah min kalpui leh a, Siang lui te min kalpui a, haw lamah Arunachal North Field Office kan tlawh nghâl baw a; a rawngbàwl puite hmél hmuh a nuam thín ngei mai. Laimekuri-ah kan riak a. Zíng dár 7:30 vêlah Jonai kan thleng a, Pi Maremi, Headmistress leh thawktu dang ten min lo dawngsawng a. Kan inngat fel a, thingpui te kan in zawhin sikul te kan fang a. Function tawi tê kan hmang a, ngaihhruina *muffler* min awrhtír a, a làwmawm tak zet. Tthla te kan lâw ho zawhin tûkthuan kan ei ho va, a hlimawm hle mai. Chawhma lamah sikul lam pawimawh te tih zawh a nih hnuah Pasighat kan va kal leh a. Field Office leh Pastor chènna te

kan tlawh a, rawngbàwlina hmunhma kan lo nei tha hle zêl mai. Tlaiah hian Jonai-a thawktuten zanriah min kîlpui a, a hlimawm hle mai. Chaw ei kham hian inkawm hona neih a ni a, zirtîr hna leh Chanchin Tha hril hna thawhnaa tûn laia an dinhmun leh mamawh te an sawi a, ngaihthlâk a nuamin thawktute inpêkna a ropui hle mai.

Zànah hian Bhairabkunda panin Rélin kan kal leh a, thawktuten Rél Station thlengin min thlah. Zíng dár 5:00 vêlah kan chhukna tùr Station kan thleng a, Pu Thatea, Headmaster, Bhairabkunda leh zirtirtu nula fel takin min lo hmuak a. Bhairabkunda hi dár 6:00 vêlah kan thleng a. Biak Inah zíng tawngtai inkhâwmah te kan tel ve a, mi 20 chuang lai chu kan ni ve àwm e. Zíng kàrah Pu Chhuanga hovin sikul lam thil pawimawh te an buaipui a. Tûkthuan ei zawhah sikulah hun hman a ni a. Tah pawh hian ngaihhraina Boro-ho Kawr min pe a, ka lâwm khawp mai. Tlai dár 2:00 vêlah Guwahati panin Pu Thatea motor-in kan kal a, dár 5:30 vêlah kan Field Office

kan thleng a. Zànah kan riak a, zíngah Airport-ah Pu Thatean min va dah a, tuang takin kan lo haw leh ta.

Hêng kan Mission hnuaia zirna hmun leh Chanchin Tha hrilna hmun ka hmu ve hian min tihlim hle mai a. Thawktute inpêkna zawng zawng chu lang thei lo mah se a hlimthla Chiang takin a hmuh theihin ka hria a, a làwmawm tak zet a ni. Zirna hmanga Chanchin Tha hril hna kan thawh hi a lo hlâwk khawp mai a. Ram inrèlbàwlina a lo danglam zêl a, Kraws thu - Chanchin Tha kan hril dân ngai ang ngawt hian kal a remchàn lohna a tam ta mai, Chanchin Tha duh lo leh hnâwlta an pung tual tual niin a lang. Hêngah te hian zirtirtu nihnain zirlai naupang te in chhúnga luh theihna lo awm zêl te hi zirtirtuten hmanruaah an lo la chat chat zêl te hi a làwmawm hle a ni. Sikul thenkhatah chuan an hmeichhe rual mah mah deuh em aw tih tùr a awm.

Krista tána thawktute Lalpan tichakin awmpui zêl rawh se.

RAMTHAR FEH

1.

1. Field hming : Siliguri Mission Field
2. Bial hming : Pradhan Nagar bial.
3. Tlawh hun : Ni 5 - 10.6.2023
4. Tlawhtu : Kolasib Venglai Ramthar Committee
5. Kal zât : Mipa – 7; Hmeichhia – 3
6. Tlawh chhan : Ramthar dinhmun zir chian leh SMB
Project chhan tùr en fiah
7. Sènso zât : ₹ 1,36,664
8. Làwmawm lam : Hripui (Covid-19) léng avàngin kum li
lai Ramtharah kan feh chhuak thei ta lo va. Ramthar Committee
chuan kumin 2023 chhúng hian Siliguri Mission Field-a Pradhan
Nagar Bial Preaching Station leh Fellowship te dinhmun hre
fiah a, kan thawktute dinhmun leh harsatnate a hmun ngeia
enfiah tûl a ti a. Tin, SMB Project List, 2023-a lo lang kan
thawh theih àwmte a hmuna en fiah tûl kan tih bawk avàngin
Feh Chhuah programme hi kan duang ta a ni.

Bialtu Pastor, Field Secretary leh SMB Secretary te nèn kan indàwr fel hnuah Field *visit*-a kal tùr member 10 inpete chu ni 5.6.2023 (Thawhtanni) zing dár 6:00-ah Silchar panin kan chhuak a. Silchar aṭangin Rélin chawhma dár 11:30-ah kal lehin, ni 6.6.2023 zing dár 7:30-ah New Jalpaiguri station kan thleng a. Kan awm dân tùr leh programme zawng zawng min duan felsaktu bialtu, Pastor Rev. Vanlaliana Sonset leh Pro Pastor Dipaka ten *rail station*-ah hian min lo hmuak a. Pradhan Nagar Bial Pastor quarters-ah min hruai thleng a. Tûkṭhuan tui tak min lo buatsaihsak chu kan kíl ho hnuah Pradhan Nagar P/S Biak Inah inlawmna programme tâwi kan hmang ho leh a. Kohhran hrang hrang tlawh chhuak tùrin Pastor leh Pro Pastor-te kaihhruainain kan feh chhuak tan ṭa ngâh a ni.

Kan chàm chhúnga Preaching Station leh Fellowship

kan tlawhte chu – New Chumta, Painikumari, Malivita, Rohini, Simulbari, Atal Bagan, Sawanline, Khaprail, Khatli, Pavitra Nagar, Pradhan Nagar leh Ranidanga Fellowship te an ni. Hei bakah hian haw tùra kan rawn chhuah ni, ni 9.6.2023 zing kárah Hatiadanga Pastor Biala Kamathpara Biak In sak that tùl tak mai, SMB Project List-a mi chu a hmunah kalin kan en a. He Biak In sakna sênso tùr hi chéng nuaithum a ni. Ringthar pun chakna bial a nih avàngin an mamawh hle a, hmun an nei tha hle bawk. Committee-in kan thlir ho hnuah hei hi kan chháng ta a ni.

Ni 9.6.2023 (Zirtàwpni) zàn dár 11:30 hi haw tùra Siliguri kan chhuahsan hun a ni a. Hemi zàn hian Pradhan Nagar Biak Inah inthlahna hun tâwi kan hmang ho va. Field Secretary, Rev. Lalrinfela Pachuau hlâwk tak thu chah a sawi a. (Ani hi Programme pawimawh avàngin Aizawlah a chám a, a tir lamah hun min hmanpui hman lo mah se hun tàwp min rawn hmanpui thei a, kan lâwm hle a ni). Làwmthu te kan inhrilh tawn a. Inthlahlel takin Rél station lam panin zàn dár 10:00-ah kan chhuak a. Pastor, Pro Pastor leh Evangelist ten min thlah a. Rél chhuah hun tikhawtlai a nih avàngin zing dár 1:00-ah kan chhuak thei ta chauh va. Anni hian kan chhuah thleng min nghahpui a ni. Tluang taka kalin ni 10.6.2023 zàn 12:50 khán mahni in lum kan thleng leh ta a ni.

9. Report tùl dangte:

1) Kan chàm chhúng hian mumal taka inkhâwmna hun tum khat Simulbari PS-ah kan nei a; Ramthar Chairman, Upa C. Rohnunan thuchah a sawi.

2) Siliguri Mission Field hi kum 1988-ah din a ni a. Pastor bial paruk, thawktu Missionery 42 leh thawktu dang 80 an awm.

3) PS leh fellowship kan tlawh 12-te hnênah ₹ 5,000 theuh kan hlàn

4) Kan tlawh apiangah an kohhran report kan ngaithla zêl a. Tawngtai hona hun te hmangin Chibai bûkna leh fuihna thu te kan sawi thîn.

5) Pradhan Nagar bialah hian PS/Fellowship 12, In 160, Member 575, ringthar pahni bākah ringthar *target* 40 an nei a ni.

6) Kan tlawhte hian duhsakna tinréng min hlàn a. Ei leh in tùr min hlui zêl bākah an hnam inchawimawina hlu puan awrh chi “Adha” te min awrhtírin, hmun khatah phei chuan Biak In luh dáwnah kan ke min silsak vek a ni.

7) Siliguri Field chhúngah hian kohhran puitling an awm rih lo va, tuna an kalphungah hian Preaching Station ni tùr chuan puitling member 10 tal an awm tùr a ni a. Pradhan Nagar bialah hian Fellowship pakhat leh PS 11 an awm mék a ni.

8) Kohhran kan tlawh thenkhat te hian Biak In an nei chaurau hle a, a then chu mi in *extension* chêp takah te inkhâwmin, a thenah chuan nèkchêpna avàngin Biak In hmun pawh an la nei thei rih lo a ni.

SMB Secretary, Field Secretary leh bialtu Pastor ten field tlawh thei tùra ruahmanna fel tak min siamsak avàngin an chungah kan lâwm tak meuh va. Kan Kohhran tlawh, lâwm tak leh hlim taka min lo dawngsawnga, duhsakna tinréng min hlântute chungah kan lâwm a. A bîk takin eng hunah maha min thlahthlam lotu, ruahmanna zawng zawng min siam felsaka, ei leh in, thlenna thlenga min ngaihtuahsaktu leh kan chêtlatna zawng zawnga min hruai zat zattu bialtu Pastor leh Pro Pastor te chungah kan lâwm tak meuh a ni. Thawktu zawng zawng ten Lal Isua vanga hrehawm an tawrhna te, an thahnemngaihna leh inpêkna ropui tak te kan hmuhin nasa takin min cho va; keimahni lam kan inen a, kan tê chem chem a ni ber e. I tawngtaipui zêl ang u.

Hmangaihzuala, Ramthar Ziaktu

Special Issue

2.

1. Field hming : Tripura Mission Field
2. Khua : Darchawi
3. Tlawh hun : Ni 28-31 August, 2023
4. Tlawhtu : Sihphir Kohhran
5. Kal zât : Mipa - 5
6. Tlawh chhan : Hnathawh
7. Senso : ₹ 19,940

8. Làwmawm lam : Thawktute chhúngkuain min beiseina tihlawhtling thei leh hnathawh chhúng, kal leh haw lam thlenga damlohnate leh chêtsualnate tàwk lova Pathian hruaina kan dawn avàngin kan làwm hle a ni.

9. Report tûl dang : Ni 28 August, 2023 (Thawhtanni) zing dár 6:00-a chhuah tuma kan inruahman laiin, Tripura Tláng mi (Kokborok) zirlaiten *Bandh* (thil phût neia kawng dan) an tum tih kan dawng a. Thulh lova ramrî (Kànhmun)-a inchhawp thlák mai t̄haa kan hriat avàngin zing dár 6:25-ah Pu V. Rosiama car-in kan chhuak a. Vànneihthlák takin kan kal tumna lam a lo zalèn hlah avàngin buaina tàwk lovin chawhnu dár 4:15-ah Darchawi khua kan thleng a. Pu C. Lal̄tanpuia, Evangelist (Bengali Project) leh Darchawi Bialtu, Pastor Lal̄nunsanga ten hlim takin min lo dawngsawng a. Zàn lamah nuhote lo lêngin kan inkawm khàwm bawk.

Ni 29 (Thawhlehn) zing dár 6:00-ah in chung rangva (hlui) thiatin, dár 11:00 vèlah tûkthuan kan ei a. Chhùn dár 12:30-ah chhunzawm lehin, tlai dár 6:15-ah khua a thim tan avàng leh hmanrua lam belh a ngaih avàng tein kan báng a. Kan hna (rangva chih) hi phai khaw lum nèn a inchàwbê viau lo va. A hna a hahthlák lo va, khaw lum tak hnuaia in chung chih a nih avàngin a khát tàwka intihthlandaih loh chuan luhai leh tui tlachham (dehydrate)-a buai a hlahhawm avàngin chawlh zeuh zeuh a tûl a. Chuvàngin, a hlui thiah leh chih nèn, zawh hman

a ni ta lo va. A tûk Nilaini zîng dár 7:00-ah chhunzawmin, dár 10:30-ah hna thawh tùra an lo ruahman chin chu kan zo thei. Chawhnu lam chu intihfai nán leh chàkkhài lam nán hun kan hmang a.

Zànah Biak In nuam takah kan va inkhàwm a. Inkhàwm tùra kan kalna kawngah chuan Baptist, Evangelical Free Church of India (EFCI) leh UPC-te Biak In lian pangngai ve tak te pal tlangin, Darchawi Kohhran, member 89 vèl lawina Kohhranah chuan kan va inkhàwm a. Biak In a nuamin, ðhutna erawh Mizoram ang bawkin kan luah séng lo hle. Bialtu Pastor-in inkhàwm a hruai a. Tantu nula fel takin an tih dàn zuiin Thupui a chhiar chhuak nghàl bawk a. Sawi hona hunah ding kan awm lo va. Kumina Tripura Synod Nilai thupui chu “Thlarau Thianghlim” tih a ni a. Hemi zàn hian “Thlarau rah” tih (Gal 5:19-22) thu zir a ni a. Mikhual ve ta chu Thuchah tâwi sawi tùrin min sáwm a, Thupui behchhanin minute 15 vèl hun ka hmang a, làwmawm ka ti hle. ‘Kristian inti zînga kohhran chi hrang hrang kan awm ðhìn hi ringlo/ringtharte rilru kan tichi-ài ðhìn mai àwm mang e,’ tih min ngaihtuahtîr a. Eng kohhran emaw ber lo din tawhna khuaah chuan, inluh thuaah loh mai hi ðha zàwka hriatnate min neihtîr a, engtia kalpui zêl nge ðha ber ang le?

Inkhawm bàn chuan Upa te leh nuho te lo lêngin hlim takin kan tî tî a, dár 10:00 pm-ah an ðin a, kan mu zui ve ta nghàl a. Zîng dár 5:30-ah Darchawi khua/Kohhran chhuahsanin, luang takin chawhnu dár 3:30-ah in kan thleng.

Upa Vanlalchhunga, Ramthar Chairman

“Pathian duh dàn taka Pathian hna kan thawk a nih chuan tlâkchham a awm ngai lo vang”

- Hudson Taylor-a

Special Issue

DECLARATION

1. Title of Newspaper : Ramthar
2. Language in which it is published : Mizo
3. Periodicity of its Publication : Monthly
4. Printer's name : Rev. R. Lalhmingsanga
- Nationality : Indian
5. Publisher's name : Rev. R. Lalhmingsanga
- Whether citizen of India : Yes
- Address : Synod Office
6. Place of publication : Mission Veng, Aizawl
7. Editor's name : Rev. Thangzauva
- Address : Ramhlun South, Aizawl
8. Owner's name : Ramthar Association
- Where printing is conducted : Synod Press
and premises on which
the press is installed : Mission Veng, Aizawl
9. Name & address of individual who
owns the newspaper and partners
or shareholders holding more than
one cent of the total capital : Nil

I, Rev. R. Lalhmingsanga, hereby declare that the particulars given above are true to the best of my knowledge and belief.

Dated, Aizawl
The 1st October, 2023

(REV. R. LALHMINGSANGA)
Signature of publisher

MEMBER THAR 2023

	Field	Hawn Kum	Jan-Aug 2023
I. HOME MISSION			
1	Home Mission North	1949	54
2	Home Mission South	1987	22
II. NORTH EAST REGION			
1	Arunachal 'E'	1991	50
2	Arunachal 'N'	2016	52
3	Arunachal 'W'	2001	82
4	Assam	2008	35
5	Barak Area	1975	106
6	Karbi Anglong	1989	117
7	Tripura	1986	595
III. CENTRAL REGION			
1	Delhi	1988	129
2	Jharkhand	2008	459
3	Calcutta	1988	761
4	Lucknow	1999	35
5	Nepal	2000	130
6	Odisha	2016	81
7	Patna	1999	172
8	Siliguri	1988	87
IV. FIELD PUITLING LO, HMA LĀKNA LIAN			
1	Masihi Sangati	1979	3898
2	Cambodia	2010	
	BELH KHAWM		6865



**Tuipuibari Pastor Bial thawktuten
Rajiv Nagar khuah ennaawm chhuahin
Chanchin Tha an hril**

**RAIDIGHI BIAK IN
Baruipur Pastor Bial
Calcutta Mission Field**

Biak In hi Electric
Veng Kohhran, Aizawl-in
an Diamond Jubilee
Project atána an sak a ni
a. Ni 27.8.2023 khán Upa
Ramngaihzualan a
hawng a, Calcutta Field
Secretary-in Pathian
hnênah a hlàn.

Raidighi Kohhran hi
1996-a dín niin, tânah
hian Kohhran mi 194 an
awm.



**Saibawh Kohhran
Beihrual Inkhâwm**

**Bungtlang South Bial
HOME MISSION SOUTH**

If not delivered please return to:
The Manager
Ramthar Chanchinbu
Synod Office, Aizawl, Mizoram
India. Pin-796001

To,
